

B O S N A I H E R C E G O V I N A
F E D E R A C I J A B O S N E I H E R C E G O V I N E
F E D E R A L N O M I N I S T A R S T V O U N U T R A Š N J I H P O S L O V A
F E D E R A L N O M I N I S T A R S T V O U N U T A R N J I H P O S L O V A
S A R A J E V O

PREDNACRT

**ZAKON
O ZAŠTITI OD POŽARA**

Sarajevo, juni 2018. godine

ZAKON O ZAŠTITI OD POŽARA

POGLAVLJE I. OSNOVNE ODREDBE

Član 1.

(Predmet zakona)

Ovim zakonom uređuje se funkcionisanje sistema zaštite od požara, nosioci i obaveze subjekata, planiranje i provođenje mjera zaštite od požara, nadležnost, organizacija zaštite od požara radi otkrivanja i sprečavanja opasnosti od požara, te spašavanja ljudi i materijalnih dobara ugroženih požarom, kao i stručno osposobljavanje i usavršavanje zaposlenih lica, finansiranje, nadzor nad provođenjem ovog zakona i druga pitanja od značaja za organizaciju i funkcioniranje zaštite od požara u Federaciji Bosne i Hercegovine (u daljnjem tekstu: Federacije).

Član 2.

(Funkcionisanje sistema zaštite od požara)

(1) Zaštita od požara prema ovom zakonu obuhvata skup mjera i radnji upravne, organizacione, tehničke, obrazovane i propagandne prirode, koje se preduzimaju u cilju sprovođenja, kontrole mjera i radnji radi sprečavanja izbijanja i širenja požara, njegovog otkrivanja, te spašavanja ljudi i materijalnih dobara i zaštite okoliša ugroženog požarom.

(2) Radi pravilne primjene mjera zaštite od požara iz stava (1) ovog člana, Federalno ministarstvo unutrašnjih poslova-Federalno ministarstvo unutaršnjih poslova (u daljnjem tekstu: FMUP) i kantonalno ministarstvo unutrašnjih poslova (u daljnjem tekstu: KMUP) na dokumentaciju i druge akte koji se izrađuje u skladu sa propisima iz oblasti prostornog uređenja i građenja, a u kojima se utvrđuju mjere zaštite od požara daju mišljenja i saglasnosti za pitanja koja se odnose na zaštitu od požara u skladu sa ovim zakonom.

Član 3.

(Obaveze subjekata odnosno nosioca zaštite od požara)

(1) Subjekti odnosno nosioci zaštite od požara, prema ovom zakonu su organi uprave i upravne organizacije Bosne i Hercegovine, Federacije, kantona, odnosno gradova i općina (u daljnjem tekstu: državni organi) i druga pravna i fizička lica koja se nalaze na području Federacije.

(2) Zaštitu od požara provode, osim subjekata, odnosno nosioca iz stava (1) ovog člana i pravna lica i organizacije koje obavljaju vatrogasnu djelatnost i djelatnost zaštite i spašavanja, u skladu sa propisima kojima se uređuje područje vatrogastva, te zaštite i spašavanja.

(3) Nosioci zaštite od požara iz st. (1) i (2) ovog člana obavezni su da preduzmu sve mjere zaštite od požara i radnje kojima će osigurati da njihova imovina ugrožena opasnostima od požara ne ugrožava živote drugih ljudi i njihovu imovinu i okoliš.

Član 4.

(Način i postupak organizovanja poslova zaštite od požara u okviru FMUP-a i KMUP-a)

(1) Radi pravilne primjene najviših nivoa organizacijski, stručnih i tehničkih standarda iz oblasti zaštite od požara, poslovi zaštite od požara utvrđeni ovim zakonom, organizacijski i kadrovski će se organizovati u FMUP-u i KMUP-u u okviru posebnih stručnih organizacijskih jedinica, što će se utvrditi pravilnikom o unutrašnjoj organizaciji tih organa.

(2) U okviru organizacione jedinice iz stava (1) ovog člana organizuju se i poslovi u vezi prijevoza opasnih materija, kao i prometa eksplozivnih materija i zapaljivih tečnosti i gasova, što će se definisati posebnim zakonima.

Član 5.

(Načelo odgovornosti)

(1) Rukovodioci u državnim organima, pravnim licima, kao i fizička lica, smatraju se odgovornim za sprovođenje mjera zaštite od požara utvrđenih ovim zakonom.

(2) Odgovorno lice za organiziranje zaštite od požara iz stava (1) ovog člana je:

- a) vlasnik, odnosno korisnik imovine kada se radi o privatnom vlasništvu,
- b) rukovodilac organa uprave, upravne organizacije i drugog državnog organa Federacije, kantona, grada i općine (u daljem tekstu: državni organi);
- c) direktor odnosno drugo odgovorno lice u privrednom društvu i drugom pravnom licu (u daljem tekstu: pravno lice), određeno općim aktom pravnog lica;

Član 6.

(Mjesta i objekti na kojima se organizuje i sprovodi zaštita od požara)

Zaštita od požara obavezno se organizuje i sprovodi u svim mjestima, prostorima, građevinama i drugim objektima koje koriste subjekti iz člana 3. ovog zakona.

Član 7.

(Preventivna zaštita od požara)

(1) Preventivna zaštita od požara utvrđena ovim zakonom i podzakonskim propisima donesenih na osnovu ovog zakona obavezno se provodi u svim državnim organima, pravnim licima koja obavljaju djelatnost ličnim radom, odnosno sredstvima u vlasništvu građana i pojedinci-fizička lica, koji su dužni da organizuju zaštitu od požara i obavezni su da osiguraju nesmetano funkcionisanje i učestvuju u provođenju preventivnih mjera zaštite od požara.

(2) Preventivna zaštita iz stava (1) ovog člana predstavlja sve mjere i radnje koje su dužni da preduzimaju lica iz stava (1) ovog člana, utvrđena zakonom i podzakonskim propisima donesenih na osnovu ovog zakona.

(3) U svrhu značajnijeg poduzimanja aktivnosti u provođenju preventivnih mjera zaštite od požara, ustanovljava se stalna tradicionalna manifestacija pod nazivom MJESECI ZAŠTITE OD POŽARA, koja se održava svake godine tokom

maja i oktobra, a organiziraju je i provode FMUP-a, KMUP-a, pravna lica, uprave civilne zaštite i druge institucije u Federaciji, u skladu sa programom koji oni donose.

Član 8.

(Značenje pojedinih izraza)

Pojedini izrazi upotrijebljeni u ovom zakonu imaju slijedeća značenja:

1) **Požar** je proces nekontrolisanog sagorijevanja gorive materije kojim se ugrožavaju život i zdravlje ljudi, materijalna dobra i životna okolina, a koji je karakterističan po istovremenom ispuštanju toplote, dima, plamena i toksičnih gasova.

2) **Otvorena vatra** je svaka zapaljena vatra izvan zatvorenog objekta koji je pod krovom i zatvorenim ognjištem;

3) **Eksplzija** je iznenadna ekspanzija gasa koja može proizaći iz brze reakcije oksidacije ili raspada, sa ili bez porasta temperature i koja može dovesti do pojave požara;

4) **Zapaljive materije** su čvrste, tečne i gasovite materije koje se pale pod dejstvom izvora paljenja;

5) **Eksplzivne materije** predstavljaju gasovite, tečne i čvrste hemijske materije, jedinjenja ili smjese koje se pod uticajem određenog impulsa razlažu u veoma kratkom vremenskom intervalu, uz oslobađanje velike količine gasova i toplotne energije;

6) **Opasne materije** predstavljaju one materije koje u svim formama postojanja i svim uslovima korištenja svojim negativnim karakteristikama, kao što su: eksplozivnost, zapaljivost, korozivnost, otrovnost, radioaktivnost i dr., mogu biti uzročnik različitih štetnih dejstava i opasnosti po zdravlje ljudi, oštećenja ili uništenja materijalnih dobara uslijed razarajućeg, termičkog ili fiziološkog dejstva, te ugrožavanje radne i životne sredine;

7) **Ugroženost od požara** je mogućnost ozlijede i/ili oštećenja kao posljedica požara;

8) **Požarna otpornost** je sposobnost objekta da ispunji, u definiranom periodu vremena zahtjeve otpornosti na požar i/ili integriteta i /ili termičke izolacije i/ili druge očekivane zahtjeve, kako je propisano normom o ispitivanju otpornosti na požar;

9) **Rizik od požara** je proizvod vjerovatnoće pojave požara koja se može očekivati u datoj tehničkoj operaciji ili stanju i posljedice ili obima šteta koje se mogu očekivati u slučaju pojave požara;

10) **Požarna sigurnost** je sigurnost kojom se vjerovatnoća nastanka požara svodi na minimum;

11) **Požarni sektor** je osnovna prostorna jedinica dijela građevine, koja se samostalno tretira u pogledu tehničkih i organizacijskih mjera zaštite od požara, a podijeljen ili odjeljen je od ostalih dijelova građevine konstrukcijama otpornim na požar;

12) **Požarno stepenište** je stepenište koje se koristi samo u slučaju opasnosti od požara za evakuaciju ili za gašenje požara;

13) **Sigurnosno stepenište** je stepenište u objektu odvojeno od unutrašnjih prostorija konstruktivnim elementima otpornosti prema vatri u trajanju od najmanje 60 minuta, oslobođeno svih gorivih materija i osigurano od zadimljavanja za vrijeme dok se ne završi evakuacija ljudi i gašenje požara;

14) **Evakuacija** je organizirano izmiještanje ljudi i materijalnih dobara sa ugroženog prostora na prostor siguran od požara;

15) **Put za evakuaciju** je posebno projektovan i izveden put koji vodi od bilo koje

tačke u građevini do vanjskog prostora ili sigurnog prostora u građevini, čiji karakteristike (otpornost i reakcija na požar, širina, visina, označavanje, protupanična rasvjeta i dr.) omogućavaju da osobe zatečene u požaru mogu sigurno (samostalno ili uz pomoć spasitelja) napustiti građevinu;

16) **Građevinom** se smatra građevinski objekt trajno povezan sa tlom koji se sastoji od građevinskog sklopa i ugrađene opreme, koji u okviru tehnološkog procesa zajedno čine tehnološku cjelinu, kao i samostalno postrojenje trajno povezano sa tlom (definicija iz Zakona o prostornom planiranju i korištenju zemljišta na nivou F BiH)

16) **Građevine za javnu upotrebu** su škole, obdaništa, studentski i đачki domovi, starački domovi, bolnice – zdravstvene ustanove, hoteli, moteli, pansioni, tržišni centri, tržnice, pozorišta, kino dvorane, sportske, koncertne i druge dvorane, stadioni, sale za konferencije, muzeji, aerodromi, željezničke i autobuske stanice, objekti kulturno - istorijskog naslijeđa i drugi objekti;

17) **Mjere zaštite od požara** su sve organizacijske, tehnološke i tehničke mjere koje smanjuju rizik od požara i povećavaju požarnu sigurnost, a provode se na uravnoteženoj kombinaciji pasivnih i aktivnih mjera zaštite od požara;

18) **Pasivne mjere zaštite od požara** predstavljaju građevinsko-arhitektonske mjere koje se temelje na požarnom i dimnom sektoriranju građevine, upotrebi ne gorivih i teško gorivih materijala, sprečavanju prenosa požara po fasadi i slično-trajno prisutne;

19) **Aktivne (represivne) mjere zaštite od požara** su tehničke mjere koje podrazumjevaju primjenu sistema aktivne zaštite od požara;

20) **Preventivne mjere zaštite od požara** su sve preventivne organizacijske, građevinske i tehničko-tehnološke mjere koje smanjuju mogućnost za nastanak požara, a pri njegovom nastanku omogućavaju sigurnu evakuaciju ljudi i imovine i sprečavaju njegovo širenje;

21) **Sistem aktivne zaštite od požara** obuhvata instalacije, uređaje i opremu za automatsko otkrivanje, dojavu, spriječavanje širenja i gašenje požara, odvođenje dima i toplote iz požara, detekciju eksplozivnih gasova, rezervno snabdijevanje električnom energijom i drugo;

22) **Vlasnik imovine** je fizičko ili pravno lice, državni organ ili druga institucija sa zaštićenim najširim ovlaštenjem posjedovanja, korištenja i raspolaganja nekom stvari;

23) **Korisnik imovine** je fizičko ili pravno lice, državni organ ili druga institucija koji na osnovu ugovara koristi imovinu vlasnika sa preuzetom obavezom po pitanju provođenja propisanih mjera zaštite od požara;

24) **Akcident** je nezgoda, nesreća, namjerno ili nenamjerno izazvana, od čijih posljedica može stradati veći broj ljudi, nastati materijalna šteta, štetne posljedice po okoliš i dr.;

25) **Promet zapaljivih, eksplozivnih i drugih opasnih materija** podrazumijeva nabavku, prodaju i upotrebu, kao i skladištenje u magacinima, priručnim skladištima i prodavnicama;

26) **Pružanje intelektualnih usluga iz oblasti zaštite od požara** predstavlja davanje stručnih mišljenja iz oblasti zaštite od požara, izrada i pregled projektne dokumentacije iz oblasti zaštite od požara;

27) **Zaposleno lice** podrazumijeva zaposlenike u pravnim licima i drugim institucijama, kao i državne službenike i namještenike u organima državne službe Federacije, kantona, općine i grada.

28) **Priznata pravila tehničke struke i prakse** su smjernice ili norme koje se primjenjuju u F BiH u slučaju nedostatka domaćih propisa, kao i strani propisi kojima se uređuje područje zaštite od požara.

29) **Pasivno dežurstvo (pripravnost za rad)** je obaveza dostupnosti za rad u slučaju potrebe u vrijeme kada se neradi (nakon redovnog radnog vremena, u vrijeme vikenda i državnih i vjerskih praznika)

Član 9.

(Zaštita od požara od posebnog interesa za Federaciju)

Zaštita od požara je od posebnog interesa za Federaciju, a provodi se na način predviđen ovim zakonom, podzakonskim propisima donesenim na osnovu ovog zakona i priznatim pravilima tehničke struke i prakse, a koji se odnose na mjere zaštite od požara utvrđene ovim zakonom.

Član 10.

(Način uređenja poslova vatrogastva, zaštite i spašavanja)

Pitanja koja se odnose na vatrogastvo, zaštitu i spašavanje uređuju se posebnim propisima, a u vezi zaštite od požara.

Član 11.

(Primjena odredbi ovog zakona na tehnološke eksplozije)

Odredbe ovog zakona primjenjuju se i na tehnološke eksplozije koje nastaju kao posljedica upotrebe eksplozivnih materija, zapaljivih tečnosti i gasova te ostalih gorivih materija koje sa zrakom mogu stvoriti eksplozivnu atmosferu, ako posebnim propisom nije drugačije određeno.

Član 12.

(Primjena zakona na građevine i prostore institucija Bosne i Hercegovine i Oružanih snaga Bosne i Hercegovine)

Odredbe ovog zakona primjenjuju se na građevine i prostore organa i institucija Bosne i Hercegovine i Oružanih snaga Bosne i Hercegovine koji se nalaze na području Federacije, ako propisom Bosne i Hercegovine nije drugačije određeno.

Član 13.

(Primjena Zakona o upravnom postupku)

Postupci koji se vode po ovom zakonu radi utvrđivanja činjenica ili drugih podataka koji se odnose na zaštitu od požara i donošenja rješenja i drugi slučajevi predviđeni ovim zakonom provode se po odredbama Zakona o upravnom postupku.

Član 14.

(Gramatička terminologija)

Gramatička terminologija u vezi sa korištenjem muškog ili ženskog roda za pojmove u ovom zakonu uključuje oba roda.

POGLAVLJE II. NADLEŽNOST, ORGANIZACIJA I FUNKCIONISANJE, PLANIRANJE I PROVOĐENJE MJERA ZAŠTITE OD POŽARA

Odjeljak A. Nadležnost organa za sprovođenje zaštite od požara

Član 15.

(Provođenje, praćenje i stručna obrada dokumenata i drugih akata iz oblasti zaštite od požara)

Stručnu obradu dokumenata i drugih akata, te preduzimanje drugih radnji iz oblasti zaštite od požara prema ovom zakon dužni su da izrađuju, prate, donose Vlada Federacije Bosne i Hercegovine (u daljnje tekstu: Vlada Federacije), federalna ministarstva i drugi organi Federacije, FMUP, kantoni, KMUP, gradovi i općine na način utvrđen u čl. 16. do 21. ovog zakona i drugim odredbama ovog zakona i podzakonskim propisima donesenih na osnovu ovog zakona.

Član 16.

(Nadležnost Vlade Federacije u oblasti zaštite od požara)

Vlada Federacije, u oblasti zaštite od požara:

- a) donosi procjenu ugroženosti od požara i plan zaštite od požara koji su od značaja za Federaciju;
- b) razmatra stanje zaštite od požara na području Federacije i utvrđuje odgovarajuće mjere za dogradnju i efikasno funkcioniranje zaštite od požara;
- c) planira potrebna finansijska sredstva u budžetu Federacije za finansiranje potreba zaštite od požara iz nadležnosti Federacije;
- d) vrši i druge poslove iz oblasti zaštite od požara, u skladu sa ovim zakonom i drugim propisima.

Član 17.

(Nadležnosti Federalnih ministarstava i drugih organa Federacije u oblasti zaštite od požara)

(1) Federalna ministarstva i drugi organi Federacije u oblasti zaštite od požara, u okviru svog djelokruga rada, organiziraju i provode zaštitu od požara radi zaštite ljudi i materijalnih dobara i zaštite okoliša.

(2) Federalna ministarstva, pored poslova iz stava (1) ovog člana, vrše i slijedeće poslove zaštite od požara i to:

- a) učestvuju u izradi procjene ugroženosti od požara i plana zaštite od požara iz člana 16. tačka a) ovog zakona, iz oblasti za koju su osnovani;
- b) učestvuje u realizaciji plana i programa zaštite od požara u skladu sa svojim nadležnostima;
- c) postupaju po uputama FMUP-a za pitanja iz oblasti zaštite od požara;
- d) vrše i druge poslove zaštite od požara, u skladu sa ovim zakonom i drugim propisima.

Član 18.
(Nadležnosti FMUP-a)

FMUP, u oblasti zaštite od požara je osnovni nosilac organizacije i funkcionisanja zaštite od požara na nivou Federacije, te vrši slijedeće poslove:

a) učestvuje u izradi procjene ugroženosti od požara i plan zaštite od požara iz člana 17. stav (2) tačka a) ovog zakona;

b) izvršava zadatke zaštite od požara utvrđene u dokumentima iz tačke a) ovog člana i ostvaruje saradnju sa federalnim ministarstvima u izvršavanju zadataka zaštite od požara iz njihove nadležnosti;

c) planiranje, organizovanje i sprovođenje mjera zaštite od požara;

d) poduzima preventivne mjere za sprečavanje izbijanja požara i ublažavanja posljedica požara;

e) ostvaruje odgovarajuću saradnju sa kantonalnim ministarstvima i službama grada i općina u pitanjima zaštite od požara koja su ovim zakonom stavljena u nadležnost kantona, grada i općine i tim organima pruža odgovarajuću stručnu i drugu pomoć, radi pravilnog i potpunog vršenja tih poslova;

f) učestvuje u akcijama zaštite i spašavanja ljudi i materijalnih dobara koji su ugroženi požarom ili eksplozijama;

g) izdaje odobrenje za vršenje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara i vodi evidenciju izdatih odobrenja;

h) organizuje polaganje stručnog ispita za lica koja obavljaju poslove ispitivanja ispravnosti i funkcionalnosti ugrađenog sistema zaštite od požara i vodi evidencije o položenom stručnom ispitu;

i) organizuje i provodi polaganje stručnog ispita za lica koja obavljaju projektovanje mjera zaštite od požara i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara i vodi evidencije o položenom stručnom ispitu;

j) izdaje odobrenje pravnim licima za projektovanje mjera zaštite od požara i/ili kontrole/revizije dokumentacije i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara i vodi evidencije izdatih odobrenja;

k) određuje (utvrđuje) posebne uslove građenja koji se odnose na primjenu mjera zaštite za građevine u skladu sa članom 35. ovog zakona;

l) izdaje saglasnosti na elaborat zaštite od požara iz člana 39. ovog zakona;

m) daje mišljenja na prostorne i druge planove zaštite od požara u skladu sa ovim zakonom;

n) rješava po žalbama koje se izjave na rješenja KMUP-a, koja su donešena na osnovu ovog zakona;

o) ostvaruje odgovarajuću saradnju sa institucijama Bosne i Hercegovine u pitanjima koja su od zajedničkog interesa za Federaciju BiH, sa nadležnim organom zaštite od požara Republike Srpske i Brčko Distrikta Bosne i Hercegovine, a saradnju sa susjednim i drugim državama u pitanjima zaštite od požara koja su od zajedničkog interesa preko Ministarstva sigurnosti Bosne i Hercegovine;

p) vodi elektronski registar izdatih odobrenja za pravna lica ovlaštena za ispitivanje aparata za gašenje početnih požara izdata od strane KMUP-ova;

r) izdaje odobrenje pravnim licima za provođenje stručne obuke i osposobljavanje zaposlenih lica u pravnim licima iz oblasti zaštite od požara i vodi evidencije izdatih odobrenja;

s) vrši nadzor nad primjenom odredaba ovog zakona i propisa donesenih na osnovu ovog zakona, odnosno planova zaštite od požara i drugih akata koji se odnose na zaštitu od požara;

t) vrši saradnju s ostalim subjektima odnosno nosiocima zaštite od požara iz člana 3. ovog zakona;

u) obavlja i druge poslove iz oblasti zaštite od požara koji su ovim zakonom i podzakonskim propisima stavljani u nadležnosti FMUP-a.

Član 19.

(Nadležnosti kantonalnih ministarstava i drugih organa kantona iz oblasti zaštite od požara)

Kanton, u oblasti zaštite od požara:

a) organizira i provodi zaštitu od požara iz nadležnosti kantona, u skladu sa ovim zakonom i drugim propisima;

b) donosi procjenu ugroženosti od požara za područje kantona;

c) donosi plan zaštite od požara kantona i osigurava njegovu realizaciju;

d) osigurava finansijska sredstva u budžetu kantona potrebna za zaštitu od požara;

e) vrši i druge poslove zaštite od požara, u skladu sa ovim zakonom.

f) uređuje organizaciju i način funkcioniranja zaštite od požara na području kantona za pitanja koja nisu regulisana ovim zakonom;

Član 20.

(Nadležnost KMUP-a iz oblasti zaštite od požara)

KMUP-a, u oblasti zaštite od požara je osnovni nosilac organizacije i funkcionisanja zaštite od požara na nivou kantona, te vrši slijedeće poslove:

a) poduzima odgovarajuće mjere i aktivnosti na organizovanju i provođenju zaštite od požara na području kantona, u skladu sa ovim zakonom i pitanjima koja uredi kanton;

b) učestvuje u izradi procjene ugroženosti od požara i plana zaštite od požara za područje kantona, uz učešće drugih ministarstava kantona;

c) planira, organizuje i nadzire provođenje mjera zaštite od požara;

d) poduzima preventivne mjere za sprečavanje izbijanja požara i ublažavanja posljedica požara;

e) izdaje odobrenja za rad servisa za ispitivanje aparata za gašenje početnih požara;

f) organizuje polaganje ispita za obavljanje poslova ispitivanja aparata za gašenje početnih požara;

g) organizuje obuku za osposobljavanje pripadnika specijalističko-spasilačkih jedinica pravnih lica iz člana 58. stav (4) ovog zakona i polaganje ispita za pripadnike tih jedinica.

h) ostvaruje saradnju sa gradskim i općinskim službama za zaštitu od požara na području kantona u pitanjima od značaja za kanton i tim službama pruža stručnu i drugu pomoć u oblasti zaštite od požara;

i) ostvaruje odgovarajuću saradnju sa FMUP-a, kao i sa kantonalnim ministarstvima susjednih kantona o pitanjima od zajedničkog interesa za zaštitu od požara;

j) organizuje polaganja ispita za zaštitu od požara za zaposlena lica koja su u pravnom licu određena da se staraju za provođenje poslova zaštite od požara, kao i lica raspoređena u službi zaštite od požara u skladu sa programom koji donosi federalni ministar unutrašnjih poslova (u daljem tekstu: ministar);

k) određuje (utvrđuje) posebne uslove građenja koji se odnose na primjenu mjera zaštite za građevine u skladu sa članom 35. ovog zakona iz svoje nadležnosti;

l) izdaje saglasnosti na elaborat zaštite od požara iz člana 39. ovog zakona;

m) daje mišljenja na prostorne planove zaštite od požara u skladu sa ovim zakonom;

n) saraduje sa ostalim subjektima zaštite od požara;

o) vrši i druge poslove iz oblasti zaštite od požara, u skladu sa ovim i drugim zakonom.

Član 21.

(Nadležnost općine, odnosno grada iz oblasti zaštite od požara)

Općina, odnosno grad, u oblasti zaštite od požara vrši sljedeće poslove i to;

a) uređuje organizaciju i funkcioniranje zaštite od požara na području općine, odnosno grada, u skladu sa ovim zakonom i drugim propisima i osigurava provođenje te zaštite;

b) organizira i provodi zaštitu od požara iz nadležnosti općine, odnosno grada u skladu sa ovim zakonom i propisima općine odnosno grada;

c) prikazuje postojeće stanje zaštite od požara na području općine odnosno grada;

d) donosi procjenu ugroženosti od požara i plan zaštite od požara iz nadležnosti općine, odnosno grada;

e) planira i osigurava finansijska sredstva u budžetu općine, odnosno grada za potrebe zaštite od požara;

f) organizuje poslove dimnjačarske djelatnosti u skladu sa članom 32. ovog zakona;

g) poduzima odgovarajuće mjere i aktivnosti na organizaciji i provođenju zaštite od požara na području općine odnosno grada, u skladu sa ovim zakonom, propisima kantona i općine, odnosno grada;

h) ostvaruje saradnju sa susjednim općinama u pitanjima od zajedničkog interesa za zaštitu od požara;

i) donosi odluku o uslovima i načinu spaljivanja poljoprivrednog i drugog gorivog otpada biljnog porijekla na otvorenom prostoru;

j) vrši i druge poslove iz oblasti zaštite od požara koji su ovim zakonom, kao i drugim propisima i odlukama općinskog odnosno gradskog vijeća stavljani u nadležnost općine, odnosno grada.

Odjeljak B. Organizacija i funkcionisanje zaštite od požara

Član 22.

(Procjena ugroženosti od požara)

(1) Organizacija i funkcionisanje zaštite od požara u Federaciji, kantonu, gradu i općini, određuje se na osnovu procjene ugroženosti od požara čije mjere i radnje su utvrđene u Planu iz člana 23. ovog zakona.

(2) Metodologiju za izradu procjene ugroženosti od požara donosi Vlada Federacije na prijedlog ministra.

Član 23.

(Plan zaštite od požara)

(1) Organizacija i funkcionisanje zaštite od požara u Federaciji, kantonu, gradu i općini, utvrđuje se u planu zaštite od požara Federacije, kantona, grada i općine.

(2) Plan zaštite od požara donosi Vlada Federacije, vlada kantona, gradonačelnik i općinski načelnik, svako iz svoje nadležnosti.

(3) Plan zaštite od požara, na osnovu procjene ugroženosti od požara, za vlastite potrebe dužni su izraditi subjekti iz člana 3. ovog zakona, za građevine razvrstane u odgovarajuće kategorije ugroženosti od požara prema odredbama člana 37. ovog zakona.

(4) Plan zaštite od požara u pravnim licima donosi odgovarajući organ upravljanja, a u državnim organima u Federaciji i drugim institucijama, rukovodilac koji rukovodi tim organom.

Član 24.

(Sadržaj plana zaštite od požara)

(1) U planovima zaštite od požara utvrđuju se:

- a) organizacija zaštite od požara,
- b) plan evakuacije i uputstva za postupanje u slučaju požara,
- c) način upotrebe specijalističko-spasilačkih jedinica pravnih lica i/ili vatrogasnih jedinica
- d) sistem obavještanja,
- e) postupak u slučaju požara,
- f) tehnička oprema i sredstva za gašenje požara,
- g) način snabdijevanja vodom,
- h) putevi, prolazi i prilazi za gašenje požara,
- i) saradnja sa drugim vatrogasnim i spasilačkim jedinicama, kao i sa jedinicama Oružanih snaga Bosne i Hercegovine i
- j) druge mjere potrebne za uspješno funkcionisanje i unapređivanje zaštite od požara i sprovođenje nadzora nad izvršavanjem mjera zaštite od požara.

(2) Planovi zaštite od požara iz stava (1) ovog člana se usklađuju sa novonastalim promjenama.

(3) Ukoliko u toku kalendarske godine nije bilo novo nastalih promjena koje koje bitno utiču na promjenu plana zaštite od požara, u tom slučaju donosioci planova iz člana 23. stav (4) ovog zakona donose poseban akt kojim potvrđuju da

nisu postojale novonastale promjene koje zahtijevaju usklađivanje plana zaštite od požara.

(4) Vlada Federacije će na prijedlog ministra donijeti propis kojim će bliže urediti pitanja iz stava (1) ovog člana, te način i postupak izrade plana zaštite od požara iz člana 23. stava (2) ovog zakona, te druga pitanja koja se odnose na izradu plana zaštite od požara.

Član 25.

(Rok i način praćenje izvršenja plana zaštite od požara)

U cilju praćenja izvršenja plana zaštite od požara iz člana 23. stav (2) ovog zakona, vlada kantona, odnosno gradsko vijeće, a u općini-općinsko vijeće, svake godine do kraja februara razmatra i ocjenjuje njegovu realizaciju i vrši odgovarajuće izmjene sa novonastalim promjenama koje su važne za zaštitu od požara, kao što su urbanističke i građevinske promjene, kao i promjene namjene građevina i slično i utvrđuje mjere za njegovu potpunu realizaciju, a posebno mjere koje se odnose na osiguravanje neophodnih finansijskih sredstava za realizaciju planiranih zadataka.

Član 26.

(Obaveza pravnih i fizička lica, državnih organa u izvršavanju zadataka utvrđenih u planu zaštite od požara)

Pravna i fizička lica, državni organi i druge institucije, dužni su izvršavati zadatke utvrđene u planu zaštite od požara iz člana 23. stav (3) ovog zakona, koji se na njih odnose.

Član 27.

(Provođenje zaštite od požara za šume, šumska i poljoprivredna zemljišta)

Zaštita od požara se organizira i provodi i za šume, šumska i poljoprivredna zemljišta i ostale prirodne resurse.

Odjeljak C. Planiranje i provođenje mjera zaštite od požara

Član 28.

(Donošenje općeg akta)

(1) Pravna lica, državni organi i druge institucije, dužni su svojim općim aktom, a u skladu sa vrstom djelatnosti koju obavljaju i procesom rada, urediti pitanja koja se odnose na organizaciju i funkcionisanje zaštite od požara u svojim objektima i prostorima, i to:

a) utvrditi način organiziranja i ostvarivanja zaštite od požara, u skladu sa ovim zakonom i podzakonskim propisima;

b) utvrditi mjere za provođenje i unapređenje zaštite od požara;

c) propisati način upoznavanja zaposlenih lica sa opasnostima od požara na radnom mjestu, prilikom prijema i raspoređivanja tih lica na radno mjesto, kao i prilikom premještanja sa jednog na drugo radno mjesto;

d) odrediti dužnosti i odgovornosti svih zaposlenih lica u provođenju propisanih mjera zaštite od požara;

e) urediti obavezu i način stručnog osposobljavanja zaposlenih lica, za provođenje mjera zaštite od požara na radnim mjestima, kao i izradu posebnih radnih uputstava za zaposlena lica koja su raspoređena na radna mjesta za koja se, zbog postojanja povećane opasnosti od požara, moraju predvidjeti posebne mjere zaštite od požara;

f) odrediti zaposleno lice koje će biti zaduženo da se stara o provođenju mjera zaštite od požara utvrđenih ovim općim aktom s tim da to lice mora imat položen ispit iz člana 20. tačka j) ovog zakona;

g) utvrditi način donošenja i provođenja plana zaštite od požara za vlastite potrebe;

h) urediti način vršenja unutarnje kontrole provođenja predviđenih mjera zaštite od požara i način vođenja evidencije o provođenju propisanih mjera zaštite od požara;

i) odrediti mjesto i prostore u kojima mora biti zabrana proizvodnje, korištenje i prenošenje otvorene vatre;

j) utvrditi dužnosti i način ponašanja zaposlenih lica u slučaju pojave požara;

k) odrediti disciplinsku odgovornost za zaposlena lica zbog nepridržavanja propisanih mjera zaštite od požara;

l) utvrditi način saradnje službe za zaštitu od požara sa službom unutrašnje zaštite ljudi i imovine, službom zaštite na radu, civilnom zaštitom.

(2) Izuzetno, pravna lica sa većim izvorima opasnosti umjesto lica iz tačke f) stav (1) ovog člana, mogu formirati stručnu službu zaštite od požara i utvrditi nadležnost te službe, što se vrši u skladu sa propisom iz člana 29. stav (3) ovog zakona.

(3) Pravna lica, državni organi i druge institucije, dužni su upoznati sva zaposlena lica sa općim aktom iz stava (1) ovog člana, o čemu vode evidenciju, te provoditi stručnu obuku i osposobljavanje za zaštitu od požara na način predviđen u članu 69. ovog zakona.

Član 29.

(Služba zaštite od požara i/ili lice zaduženo za planiranje i provođenje mjera zaštite od požara)

(1) Za planiranje i provođenje mjera zaštite od požara utvrđene ovim zakonom i aktom iz člana 28. ovog zakona pravna lica i državni organi dužni su utvrditi način organizovanja poslova zaštite od požara, koji se mogu obavljati putem formiranja stručne službe zaštite od požara ili posebnim aktom odrediti zaposlenika koji će pratiti provođenje mjera zaštite od požara.

(2) Poslove iz stava (1) ovog člana mogu obavljati lica koja imaju položen ispit iz člana 20. tačka j) ovog zakona, s tim da rukovodilac službe za zaštitu od požara iz stava (1) ovoga člana mora imati položen stručni ispit iz člana 47. ovog zakona.

(3) Vlada Federacije odnosno vlade kantona će odrediti pravna lica iz stava (1) ovog člana koja su dužna organizovati službu zaštite od požara i način organizovanja te službe.

Odjeljak D. Odgovornosti vlasnika, odnosno korisnika građevina i drugih prostora za provođenje mjera zaštite od požara

Član 30.

(Odgovornost vlasnika, odnosno korisnika građevine i prostora za zaštitu od požara)

(1) Vlasnik, odnosno korisnik građevine i prostora odgovoran je za zaštitu od požara u tim građevinama, odnosno objektima i dužan je da osigura i preduzima provođenje mjera zaštite od požara utvrđene ovim zakonom i uputama datih od nadležnog organa kako bi se osigurala zaštita građevine odnosno prostora od požara u skladu sa članom 31. ovog zakona.

(2) Za provođenje mjera zaštite od požara u višespratnim građevinama–stambenim objektima, upravitelj stambenog objekta odgovoran je za provođenje mjera zaštite od požara u skladu sa ovim zakonom i drugim propisima kojima se regulišu pitanja zaštite od požara.

Član 31.

(Obaveze vlasnika odnosno korisnika građevina i drugih nekretnina)

Radi provođenja obaveza iz člana 30. ovog zakona vlasnici, odnosno korisnici građevina i drugih nekretnina te prostora, odnosno upravitelji zgrada dužni su:

a) osigurati provođenje mjera propisanih ovim zakonom, propisima donesenim na osnovu ovoga zakona te drugim propisima, planovima, aktima i odlukama iz zaštite od požara na njihovom području i/ili vlasništvu,

b) poduzeti mjere za smanjenje opasnosti od nastanka i širenja požara, kao i mjera za unapređenje stanja zaštite od požara na svom vlasništvu uzimajući u obzir ugroženost i stanje zaštite od požara,

c) posjedovati, uređaje, opremu, alat i sredstva za dojavu, gašenje i spriječavanje širenja požara na svom vlasništvu, odnosno na svom području u količinama, vrsti i na mjestima kako je utvrđeno posebnim propisima te procjenama i planovima zaštite od požara.

Član 32.

(Uređenje dimnjačarske djelatnosti)

(1) Vlasnici, korisnici građevina i upravitelji stambenih objekata iz člana 30. ovog zakona dužni su da provode poslove dimnjačarske djelatnosti u skladu sa propisom iz stava (2) i (3) ovog člana.

(2) Općinsko odnosno gradsko vijeće svojom odlukom uređuje organizaciju i rad dimnjačarske djelatnosti, rokove čišćenja dimnjaka, uvjete za vršenje dimnjačarske službe, te druga pitanja od značaja za obavljanje dimnjačarske djelatnosti, te obavljanje nadzora nad radom dimnjačarske službe.

(3) Ukoliko je dimnjačarska djelatnost organizovana na nivou kantona ili za više općina, odnosno gradova u kantonu, propis iz stava (2) ovog člana donosi nadležni organ kantona.

Član 33.

(Mjere za zaštitu od požara)

(1) Mjere za zaštitu od požara, u smislu ovog zakona predstavljaju sljedeće radnje i postupke i to;

a) izbor lokacije i dispozicija građevine, kao i izbor materijala, uređaja instalacija i konstrukcija kojim će se spriječiti ili svesti na najmanju mjeru mogućnost izbijanja i širenja požara;

b) izgradnja prilaznih puteva i prolaza za vatrogasna vozila i tehniku;

c) izgradnja požarnih stepeništa i pomoćnih izlaza;

d) osiguranje potrebnih količina vode i drugih sredstava za gašenje požara;

e) organiziranje osmatračko-dojavne službe, izrada i održavanje protivpožarnih prosjeka i puteva, osiguranje opreme i sredstava za gašenje šumskih požara, te druge mjere zaštite od požara na otvorenom prostoru;

f) zabrana upotrebe otvorene vatre i drugih izvora paljenja na mjestima i prostorima gdje bi zbog toga moglo doći do prenošenja i širenja požara čime bi se ugrozili ljudski životi i nastupila materijalna šteta;

g) izbor i održavanje tehnoloških procesa i uređaja kojima se osigurava sigurnost protiv požara;

h) postavljanje uređaja za javljanje, gašenje i sprečavanje širenja požara, uređaja za mjerenje koncentracije zapaljivih i eksplozivnih gasova, para ili prašine u vazduhu i drugih uređaja za kontrolu sigurnog odvijanja tehnološkog procesa;

i) održavanje i kontrola ispravnosti uređaja i instalacija čija neispravnost može uticati na nastanak i širenje požara;

j) obuka svih zaposlenih lica i građana u praktičnoj upotrebi aparata za gašenje početnog požara, kao i drugih priručnih sredstava i opreme za gašenje požara.

(2) Mjere iz stava (1) ovog člana dužni su provoditi svi vlasnici i/ili korisnici građevina i drugih nekretnina te prostora, odnosno upravitelji zgrada, koje koriste u svom radu.

Član 34.

(Mjere zaštite od požara u oblasti prostornog planiranja)

(1) Organ uprave nadležan za poslove prostornog uređenja osiguraće da se pri izradi dokumenata prostornog uređenja i to: prostornog plana Federacije, prostornog plana područja posebnih obilježja Federacije, prostornog plana kantona, prostornog plana područja posebnih obilježja kantona, prostornog plana općine odnosno grada, urbanističkog plana, regulacionog plana i urbanističkog projekta, predvide prostorne i tehničke mjere zaštite od požara, a naročito:

a) uslove za efikasno spašavanje ljudi, životinja i materijalnih dobara i zaštite okoliša;

b) potrebne razmake ili protivpožarnu udaljenost između objekata;

c) saobraćajne i manipulativne površine za interventna vozila;

d) izvode za dovoljno snabdijevanje vodom za gašenje požara;

e) primjenu odgovarajućih materijala koji ne mogu biti uzročnici nastanka i prenosa požara.

(2) Uz dokumente iz stava (1) ovog člana izrađuje se elaborat zaštite od požara i/ili elaborat o zonama opasnosti ugroženog prostora izloženih eksplozivnom atmosferom (u daljem tekstu: elaborat), u kojem se razrađuju mjere iz stava (1) ovog

člana i na koji mišljenje daje FMUP-a i KMUP-a na način utvrđen u stavu (3) ovog člana.

(3) Na dokumente iz stava (1) ovog člana mišljenja izdaju i to;

a) na prostorni plan Federacije i prostorni plan područja posebnih obilježja Federacije - mišljenje izdaje FMUP-a;

b) na prostorni plan kantona, prostorni plan područja posebnih obilježja kantona, prostorni plan općine odnosno grada, urbanistički plan, regulacioni plan i urbanistički projekat mišljenje izdaje KMUP-a.

(4) Nadležni organi koji izrađuju dokumente iz stava (1) ovog člana dužni su prije usvajanja tih dokumenata pribaviti mišljenje iz stava (2) ovog člana.

(5) Federalno ministarstvo prometa i komunikacija u saradnji sa FMUP-om donijet će propis o uslovima za vatrogasne pristupe i prolaze za stambene i druge zgrade i objekte i za sve prostore koji se smatraju građevinama i prostorima u skladu sa stavom (1) ovog člana.

Član 35.

(Posebni uslovi građenja)

(1) FMUP, odnosno KMUP-a utvrđuje (određuje) posebne uslove građenja koji se odnose na primjenu mjera zaštite od požara, a kojim se uređuje planiranje i izgradnja složenih energetskih, vodoprivrednih, saobraćajnih i infrastrukturnih građevina ili njihovih dijelova, kao i privremenih objekata za potrebe sajмова i održavanje manifestacija, utvrđenih za građevine koje su kategorisane u požarnu ugroženost PU1 i PU2 u skladu sa članom 36. i 37. ovog zakona.

(2) Posebni uslovi iz stava (1) ovog člana utvrđuju se na zahtjev nadležnog organa za prostorno uređenje i građenje.

(3) FMUP daje saglasnost na tehničku dokumentaciju i odobrava lokaciju za objekte koji služe za proizvodnju i skladištenje naoružanja, municije i vojne opreme (namjensku industriju), uz pribavljeno mišljenje Ministarstva odbrane Bosne i Hercegovine.

(4) Odredbe ovoga člana na odgovarajući se način primjenjuju i na izmjene i/ili dopune rješenja o uslovima građenja, te rješenja o izvedenom stanju koja se izdaju prema propisu kojim se uređuje područje prostornog planiranja i korištenja zemljišta na nivou Federacije Bosne i Hercegovine.

Odjeljak E. Razvrstavanje građevina u odgovarajuće kategorije ugroženosti od požara

Član 36.

(Klasifikacija građevina prema ugroženosti od požara)

(1) Klasifikacija građevina iz stava (3) ovog člana se vrši prema svojoj namjeni te se klasifikuju na građevine visokogradnje (klasa 1) i građevine niskogradnje (klasa 2) na osnovu klasifikacije vrsta građevinskih objekata Bosne i Hercegovine - KVGGO BiH koja je statistički standard definisan Zakonom o statistici BiH.

(2) Građevinski objekti koji se koriste ili su projektovani za različite svrhe (npr. kombinacija stambene, hotelske i poslovne zgrade/građevine) moraju se razvrstati u jednu klasifikacionu šifru, prema glavnoj tj. pretežnoj namjeni objekta.

(3) Na osnovu dodijeljene klasifikacije utvrđuje se kategorija ugroženosti od požara građevina visokogradnje i niskogradnje u zavisnosti od sljedećih kriterija: namjene građevine, broju ljudi koji u njima borave, zastupljenog tehničko-tehnološkog procesa, vrste i količine materijala koji se u njima proizvode, prerađuju, prodaju ili skladište, veličine i spratnosti građevine, lokacije građevine, vrste materijala koji su upotrijebljeni za izgradnju građevine, proračuna požarnog opterećenja.

Član 37.

(Kategorizacija prema ugroženosti od požara)

(1) U cilju utvrđivanja odgovarajuće organizacije i preduzimanja preventivnih mjera zaštite od požara potrebnih za uspješno funkcionisanje i sprovođenje zaštite od požara, građevine se razvrstavaju u sljedeće kategorije požarne ugroženosti :

- a) požarna ugroženost PU1 – građevine sa visokim rizikom od izbijanja požara;
- b) požarna ugroženost PU2 – građevine sa srednjim rizikom od izbijanja požara;
- c) požarna ugroženost PU3 –građevine sa niskim rizikom od izbijanja požara.

(2) Kategorizacija građevine prema požarnoj ugroženosti treba da bude potvrđena numeričkim proračunom požarnog opterećenja na osnovu važećeg standarda.

(3) Vlasnici, odnosno korisnici i upravitelji građevina, građevinskih dijelova i drugih nekretnina, te prostora razvrstani u određenu kategoriju ugroženosti od požara dužni su poduzimati i provoditi potrebne mjere zaštite od požara.

(4) Vlada Federacije, na prijedlog ministra uz saglasnost federalnog ministara za prostorno uređenje, propisuje osnove, mjerila i uvjete kategorizacije iz stava (1) ovog člana, kao i druga pitanja koja se odnose na kategorizaciju građevina.

Odjeljak F. Sadržaj i izrada projektne dokumentacije, izdavanje rješenja o odobrenju za građenje i upotrebu građevine

Član 38.

(Utvrđivanje mjera zaštite od požara u glavnom projektu)

(1) Vrsta i obim mjera za zaštitu od požara utvrđenih ovim zakonom za svaku građevinu se definiše glavnim projektom građevine za gradnju, projektovanje sistema aktivne zaštite od požara, dogradnju i rekonstrukciju objekta sa svim pripadajućim instalacijama, opremom i uređajima koji se izrađuje u skladu sa propisima koji regulišu pitanje prostornog uređenja i građenja.

(2) Glavni projekat iz stava (1) ovog člana za građevine PU1 i PU2. iz člana 37. ovog zakona, sadrži elaborat, koji je sastavni dio projektne dokumentacije.

(3) Elaborat iz stava (2) ovog člana izrađuje pravno lice koje ima odobrenje FMUP-a iz člana 18. tačka j). ovog zakona.

(4) Za građevine koje su razvrstane u kategoriju PU3 glavni projekat treba da sadrži potvrdu o primjenjenim mjerama zaštite od požara koji je ovjeren od strane pravnog lica koje ima odobrenje iz stava (3) ovog člana.

(5) Odobrenje iz stava (3) ovog člana može se izdati pravnom licu koje ispunjava sljedeće uslove i to:

a) da je registrovano za obavljanje djelatnosti projektovanja;

b) da ima zaposleno lice koje ima položen stručni ispit za projektovanje mjera zaštite od požara i/ili posebnih sistema zaštite od požara i/ili pružanje intelektualnih usluga iz oblasti zaštite od požara iz člana 47. ovog zakona;

(6) Ministar će propisat način i postupak izdavanja odobrenja za projektovanje mjera zaštite od požara i/ili kontrole/revizije dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara i druga pitanja koja se odnose na izdavanje i/ili oduzimanje tog odobrenja.

Član 39.

(Sadržaj elaborata)

(1) Elaborat iz člana 38. ovog zakona minimalno sadrži:

a) procjenu požarne ugroženosti s obzirom na lokaciju, dispoziciju i namjenu građevine, građevinske i tehničko – tehnološke karakteristike;

b) izbor tehničkih rješenja, tehnoloških, elektro, mašinskih, građevinskih i drugih mjera u funkciji zaštite od požara;

c) izbor mjera, tehničko-tehnoloških rješenja i građevinskih materijala u funkciji evakuacije i spašavanja ljudi i materijalnih dobara sa opisom i uputstvima za postupak evakuacije;

d) izbor tehničke opreme i sredstava za gašenje požara, kao i drugih mjera u funkciji gašenja požara (putevi, prolazi, prilazi, snabdijevanje vodom i sl.);

e) opis organizacije posla i potrebna uputstva u vezi sa primijenjenim mjerama zaštite od požara;

f) zone opasnosti;

g) grafičke prikaze primjenjenih mjera zaštite od požara;

h) popis primjenjenih propisa, standarda i normativa, odnosno priznatih i dokumentiranih pravila tehničke prakse u inostranstvu koji nisu regulirani propisima, a koje je prihvatila BiH;

i) izjavu glavnog projektanta da su u projektnoj dokumentaciji primjenjene sve mjere zaštite od požara;

j) broj i datum dokumenta, koji je ovjeren potpisom i žigom.

(2) Za objekte i građevine posebne namjene (proizvodnja i skladištenje eksplozivnih materija, zapaljivih tečnosti i gasova), pored elaborata iz stava (1) ovog člana, pravni subjekti iz člana 3. ovog zakona dužni su izraditi i Elaborat o zonama opasnosti ugroženog prostora izloženih eksplozivnom atmosferom, koji minimalno sadrži:

a) definisanje opasnog prostora i zona opasnosti sa listom eksplozivnih i zapaljivih supstanci sa njihovim osnovnim fizičko-hemijskim karakteristikama koje su značajne sa aspekta protiveksplozijske zaštite;

b) svrha i postupak klasifikacije prostora;

c) izbor električnih uređaja u zonama opasnosti;

d) izbor električnih zaštita u zonama opasnosti;

e) kratki opis tehnoloških procesa;

f) prostorni raspored zona opasnosti;

g) definisanje izvora opasnosti;

- h) proračun rasprostiranja potencijalno eksplozivne atmosfere;
- i) preporuke i instrukcije kojima se uređuje oblast zona opasnosti;
- j) grafičke prikaze primjenjenih mjera zaštite od požara i eksplozije;
- k) zaključak;
- l) propisi i literatura korištena prilikom izrade elaborata.
- m) izjavu glavnog projektanta da su u projektnoj dokumentaciji primjenjene sve mjere zaštite ugroženog prostora izloženog eksplozivnoj atmosferi;
- n) broj i datum dokumenta, koji je ovjeren potpisom i žigom.

(3) Ministar će propisati sadržaj i postupak izrade elaborata zaštite od požara i elaborata o zonama opasnosti ugroženog prostora izloženih eksplozivnom atmosferom, kao i druga pitanja koja se odnose na izradu elaborata i projektovanje sistema aktivne zaštite od požara.

Član 40.

*(Izrada elaborata i izdavanje potvrde
o primjenjenim mjerama zaštite od požara)*

(1) Izradu elaborata iz čl. 38. stav (2) i izdavanje potvrde o primjenjenim mjerama zaštite od požara iz člana 38. stav (4) ovog zakona, mogu obavljati samo pravna lica iz člana 38. stav (3) ovog zakona.

(2) Pravno lice iz stava (1) ovog člana, dužno je mjere zaštite od požara, predviđene u glavnom projektu prikazati tako da se na osnovu grafičkih prikaza, proračuna i tekstualnih objašnjenja može ocijeniti funkcionalnost i efikasnost predviđenih mjera zaštite od požara.

(3) Pravna lica iz stava (2) ovog člana koja su učestvovala u izradi glavnog projekta dužna su ga provjeriti na način utvrđen u članu 41. stav (4) ovog zakona i nakon provjere izdati potvrdu da su primjenjene mjere zaštite od požara u glavnom projektu izrađene u skladu sa ovim zakonom, uvjetima uređenja prostora, tehničkim normativima i standardima i pravilima tehničke prakse.

Član 41.

*(Kontrola/revizija projektne dokumentacije na primjenjene mjere
iz oblasti zaštite od požara)*

(1) Obaveznoj kontroli/reviziji Elaborata kao sastavnog dijela glavnog projekta podliježu svi projekti građevina i objekata, projekti sistema aktivne zaštite od požara, kao i projekti za rekonstrukciju i sanaciju dijelova postojećih građevina.

(2) Kontrolor/Revident može biti pravno lice koje ima odobrenje iz člana 18. tačka j) ovog zakona.

(3) Kontrolor/Revident ne može obavljati kontrolu/reviziju projekta u čijoj je izradi u cijelosti ili djelomično sudjelovao ili ako je taj projekat u cijelosti ili djelomično izradilo pravno lice u kojem je zaposlen.

(4) Kontrolor/Revident je dužan, nakon što obavi provjeru projekta, ovjeriti dijelove projekta te o tome sastaviti pisani izvještaj-mišljenje.

Član 42.

(Saglasnost na mjere zaštite od požara)

(1) Organ nadležan za izdavanje odobrenja za građenje može izdati odobrenje za građenje tek nakon pribavljene saglasnosti iz člana 48. ovog zakona (za građevine PU1 i PU2 iz čl. 36. i 37. ovog zakona) da su u elaboratu, kao sastavnom dijelu glavnog projekta sačinjene, predviđene propisane mjere zaštite od požara iz člana 33. stav (1) i člana 43. ovog zakona.

Član 43.

(Predviđanje i primjena mjere zaštite od požara pri projektovanju i gradnji građevina i ugradnji priključaka, opreme, uređaja i postrojenja)

(1) Građevine moraju biti projektovane i izgrađene tako da se u slučaju požara:

- a) čuva nosivost konstrukcije, da ne dođe do širenja vatre i dima unutar građevine i na susjedne objekte,
- b) da omogući da lica mogu neozlijeđeno napustiti građevinu ili njihovo spašavanje,
- c) da omoguće zaštitu vatrogasca ili spasioca,
- d) da građevina mora biti projektovana i izgrađena da u toku normalnog korištenja ne može da dođe do eksplozije.

(2) Pri projektovanju i gradnji građevina i ugradnji priključaka, opreme, uređaja i postrojenja, kao i njihovoj proizvodnji, moraju se predvidjeti i primjeniti mjere zaštite od požara koje će omogućiti:

- a) smanjenje mogućnosti nastanka požara;
- b) pravovremeno otkrivanje i obavještanje o požaru;
- c) efikasno spašavanje radnika i materijalnih dobara s gradilišta;
- d) ograničavanje širenja vatre i dima;
- e) efikasno gašenje požara;
- f) osiguranje saobraćajnih i manipulativnih površina za interventna vozila;
- g) te druge zahtjeve koje u vezi sa zaštitom od požara moraju ispunjavati građevine i ugrađeni materijali svojstva otpornosti na požar i/ili reakciju na požar građevinskih proizvoda i materijala koji se ugrađuju, a koju potvrđuju atestom.

Član 44.

(Požarno stepenište)

(1) Pri projektovanju stambenih i poslovnih objekata, industrijskih građevina, energetskih objekata i građevina za javnu upotrebu (bolnice, hoteli, sportske i druge dvorane, robne kuće, škole, saobraćajne stanice, aerodromi i drugi slični objekti) određuju se požarni sektori i nužni izlazi.

(2) Pored komunikacionog stepeništa u objektu iz stava (1) ovog člana se obavezno projektuju i/ili požarno stepenište ili prelazi u drugi požarni sektor.

(3) Požarno stepenište se određuje na osnovu odgovarajućih standarda iz člana 39. stav (1) tačka h) ovog zakona i proračuna požarnog opterećenja, načina širenja požara, rizika od požara i materijalne vrijednosti građevine ili njegovog dijela.

Član 45.

(Projektovanje i postavljanje električne, ventilacione, gasne, naftovodne, toplovodne, gromobranske i drugih instalacija, uređaja i dimovoda)

(1) Električne, ventilacione, gasne, naftovodne, toplovodne, gromobranske i druge instalacije i uređaji, kao i dimovodi i ložišta, moraju se projektovati, postaviti odnosno izvoditi, koristiti i održavati prema propisima o tehničkim normativima i standardima koji se odnose na ta pitanja, kao i uputstvima proizvođača o čemu mora postojati dokumentacija.

(2) Instalacije i uređaji iz stava (1) ovog člana mogu se upotrebljavati samo ako su ispravni i ako su pravilno postavljeni, što se utvrđuje atestom o ispravnosti instalacija.

Član 46.

(Izdavanje odobrenja za upotrebu izgrađene ili rekonstruisane ili dograđene i nadograđene građevine)

(1) Odobrenje za upotrebu izgrađene ili rekonstruisane ili dograđene i nadograđene građevine može se izdati tek onda kada član komisije za tehnički pregled, koji vrši pregled sa stanovišta zaštite od požara i/ili eksplozija, utvrdi i dokumentira da su provedene i sve mjere zaštite od požara i/ili eksplozija predviđene u elaboratu iz člana 39. st. (1) i (2) ovog zakona, kao i odgovarajuća pravila tehničke struke i prakse, a posebno slijedeće:

- a) osiguran dokaz o karakteristikama ugrađenih građevinskih materijala i elemenata konstrukcije odgovarajućih požarnih karakteristika i vatrootpornosti;
- b) osigurana podjela građevine u požarne sektore;
- c) osigurane propisane karakteristike požarnih i sigurnosnih stepeništa i puteva evakuacije;
- d) propisno obilježeni putevi evakuacije i izlazi prema požarnim i sigurnosnim stepeništima ili u siguran prostor;
- e) osigurana funkcionalnost uređaja za odvođenje dima i toplote, protivpožarnih klapni, protivpožarnih vrata, hidrantske mreže, stabilnih instalacija za gašenje požara, uređaja/aparata za gašenje početnog požara, sistema za dojavu požara, uređaja o prisutnosti eksplozivnih para/gasova, sigurnosnog osvjetljenja (pomoćnog i paničnog) i druge predviđene mjere.

(2) Nadležni inspektori za zaštitu od požara, koji ispunjavaju uslove za učešće u radu komisija za tehnički prijem građevine ili objekta, mogu učestvovati u tehničkom pregledu građevine ili objekta, samostalno po pozivu organa koji vodi postupak i mogu u zapisnik unijeti svoje mišljenje u pogledu ispravnosti objekta.

Član 47.

(Stručni ispit koji organizuje FMUP)

(1) Stručni ispit za projektovanje mjera zaštite od požara i/ili posebnih sistema zaštite od požara i/ili pružanje intelektualnih usluga iz oblasti zaštite od požara iz člana 38. stav (5) tačka b) ovog zakona može polagati lice koje ispunjava sljedeće uslove i to;

- a) da je državljanin Bosne i Hercegovine;
- b) da se protiv njega ne vodi krivični postupak i da nije kažnjavan za krivična djela protiv života i krivično djelo protiv imovine;

c) da ima najmanje visoku stručnu spremu tehničkog - tehnološkog smjera VSS, odnosno visoko obrazovanje prvog, drugog ili trećeg ciklusa Bolonjskog sistema studiranja (koji se vrednuje sa 240 ECTS bodova);

d) da ima najmanje pet godina radnog iskustva u struci (zaštita od požara; zaštita na radu; mašinska, elektro, građevinska, arhitektonska, hemijska tehnološka).

(2) Stručni ispit iz stava (1) ovog člana, izuzetno ne moraju polagati lica koja imaju najmanje pet godina radnog iskustva na poslovima inspeksijskog nadzora iz oblasti zaštite od požara u ministarstvu unutrašnjih poslova, što dokazuju potvrdom nadležnog MUP-a.

(3) Ispit iz stava (1) ovog člana polaže se pred Komisijom koju sačinjavaju predstavnici ministarstva unutrašnjih poslova (ovisno o regionalnoj zastupljenosti kandidata), a koju imenuje federalni ministar.

(4) Ministar će propisati sadržaj programa i način i postupak polaganja stručnog ispita iz stava (3) ovog člana i druga pitanja koja se odnose na polaganje tog ispita.

Član 48.

(Nadležnost FMUP-a i KMUP-a za donošenje akata po ovom zakonu)

(1) Posebne uslove građenja koje se odnose na primjenu mjera zaštite od požara iz člana 35. ovog zakona, saglasnost na elaborat iz člana 38. ovog zakona u vezi primjenjenih mjera zaštite od požara, za objekte odnosno građevine za koje odobrenje za građenje izdaje nadležni organ kantona, općine odnosno grada, utvrđuje odnosno izdaje KMUP-a.

(2) Posebne uslove građenja koje se odnose na primjenu mjera zaštite od požara, saglasnost na elaborat iz stava (1) ovog člana, utvrđuje odnosno izdaje FMUP-a, za objekte odnosno građevine za koje odobrenje za građenje izdaje Federalno ministarstvo za prostorno uređenje.

Odjeljak G. Nabavka i održavanje sredstava namijenjenih za dojavu, gašenje i sprečavanje širenja požara

Član 49.

(Održavanje i ispitivanje aparata za gašenje početnih požara)

(1) Vlasnici/korisnici objekata ili upravitelji dužni su da osiguraju odgovarajući broj i vrstu aparata za gašenje početnih požara (u daljem tekstu: aparat), osiguraju njihovo održavanje i ispitivanje ispravnosti i funkcionalnosti, u skladu sa propisima o tehničkim normativima i standardima koji se odnose na ta pitanja i uputstvom proizvođača, odnosno najmanje jednom godišnje.

(2) Održavanje i ispitivanje aparata iz stava (1) ovog člana mogu vršiti pravna lica koja su registrirana i ovlaštena za tu djelatnost, a neposredne poslove održavanja i ispitivanja mogu vršiti lica koja su položila stručni ispit iz stava (6) ovog člana, s tim da se pod istim uvjetima na obavljanju tih poslova mogu angažirati profesionalne i dobrovoljne vatrogasne jedinice.

(3) O svakom izvršenom pregledu i ispitivanju sačinjava se zapisnik koji sadrži: datum ispitivanja, identifikacijske podatke aparata, lokaciju aparata, ime i

potpis lica koje je izvršilo ispitivanje i nedvosmisleni konstataciju o ispravnosti aparata i taj zapisnik se dostavlja vlasniku aparata.

(4) Evidenciona kartica se mora zalijepiti na aparat samo ako je ispitan i ispravan.

(5) Aparat čija se posuda ili neki njen dio moraju ispitivati na pritisak smatra se neispravnim ako ispitivanje iz stava (2) ovog člana nije obavljeno u skladu sa propisom iz stava (6) ovog člana, a aparat za koji ne postoji evidencija o njegovoj ispravnosti smatra se neispravnim.

(6) Ministar će propisati uslove koje moraju ispunjavati pravna lica koja obavljaju kontrolu ispravnosti, servisiranje i održavanje aparata, kao i sadržaj i način polaganja ispita za lica koja lično (neposredno) obavljaju poslove ispitivanja, servisiranja i održavanja aparata iz stava (1) ovog člana, kao i druga pitanja koja se odnose na ispitivanje, održavanje i servisiranje aparata za gašenje početnih požara.

Član 50.

(Proizvodnja i promet uređaja, opreme i sredstava namijenjenih za dojavu, gašenje i sprečavanje širenja požara)

(1) Proizvodnja i promet uređaja, opreme i sredstava namijenjenih za dojavu, gašenje i sprečavanje širenja požara, te drugih uređaja i instalacija u funkciji sprečavanja nastanka požara i eksplozije obavljaju se u skladu sa posebnim propisima koji se odnose na ta pitanja.

(2) U proizvodnji, postupcima i uslugama u kojima se koriste uređaji, oprema, sredstva i instalacije iz stava (1) ovog člana, za koje nisu doneseni standardi i propisi Bosne i Hercegovine, mogu se primjenjivati međunarodni standardi i propisi koji se odnose na ta pitanja, a koje je prihvatila Bosna i Hercegovina.

(3) Za uređaje, opremu i sredstva iz stava (1) ovog člana, za koje je posebnim propisima predviđeno odobravanje (certificiranje) prije stavljanja u promet, troškove certificiranja snosi proizvođač - ako se radi o domaćoj proizvodnji, odnosno uvoznik ili zastupnik firme iz inostranstva kad se radi o inostranoj proizvodnji.

(4) Domaći proizvođač, uvoznik ili zastupnik firme iz inostranstva, kao i posrednik u prodaji uređaja, opreme i sredstava iz stava (1) ovog člana, ne smiju prodati krajnjem kupcu navedene uređaje, opremu i sredstva ukoliko nisu certificirani po proceduri predviđenoj posebnim propisima iz člana 62. stav (1) ovog zakona i ako nemaju uputstvo na jednom od službenih jezika u Federaciji.

Odjeljak H. Promet i prodaja zapaljivih, eksplozivnih i drugih opasnih materija

Član 51.

(Promet zapaljivih, eksplozivnih i drugih opasnih materija)

(1) Zapaljive, eksplozivne i druge opasne materije ne smiju se upotrebljavati i skladištiti na način koji nije u skladu sa propisanim tehničkim normativima i standardima i koji nije siguran po rukovaoca i okolinu, što je uređeno posebnim propisima iz te oblasti.

(2) Prijevoz zapaljivih, eksplozivnih i drugih opasnih materija vrši se u skladu sa propisima kojima je uređena ta oblast.

Član 52.

(Prodaja zapaljivih, eksplozivnih i drugih opasnih materija)

Proizvođač ili prodavac ne smije staviti u prodaju zapaljive, eksplozivne i druge opasne materije, ako nisu upakovane u propisanu ambalažu koja je označena odgovarajućim oznakama opasnosti i ako ne posjeduje propisanu dokumentaciju izdatu od strane proizvođača na jednom od službenih jezika u Federaciji, što se vrši u skladu sa propisima kojima je uređena ta materija.

Odjeljak I. Planiranje i provođenje mjera zaštite od požara u određenim oblastima

Član 53.

(Zaštita od požara u saobraćaju)

Pri prijevozu ljudi i životinja, kao i transportu roba u cestovnom, željezničkom, pomorskom, riječnom, jezerskom i avionskom saobraćaju i transportu cjevovodima, moraju se provoditi propisane mjere zaštite od požara.

Član 54.

(Zaštita od požara u šumama, na šumskom i poljoprivrednom zemljištu)

(1) Zaštita od požara u šumama, na šumskom i poljoprivrednom zemljištu organizira se i provodi u skladu sa propisima koji se odnose na šume, šumsko i poljoprivredno zemljište, s tim što se mora postupiti i prema odredbi člana 33. stav (1) tač. e) i f) ovog zakona.

(2) Odgovornost za zaštitu od požara u šumama, na šumskom i poljoprivrednom zemljištu imaju sva pravna i fizička lica koja su vlasnici ili korisnici šuma, šumskog i poljoprivrednog zemljišta, kao i organi uprave Federacije, kantona, grada i općine koji su nadležni za šume i šumska zemljišta, te poljoprivredno zemljište.

(3) Ako zaštita od požara u šumama, na šumskom i poljoprivrednom zemljištu nije uređena propisima iz stava (1) ovog člana, zaštita od požara se organizira i provodi u skladu sa ovim zakonom.

Član 55.

(Zaštita od požara u rudarskim objektima i lokalitetima)

Zaštita od požara u rudarskim objektima organizira se i provodi u skladu sa ovim propisom, osim u podzemnim objektima-jamama u kojima se vrši eksploatacija mineralnih sirovina, u kojima se zaštita od požara vrši u skladu sa posebnim propisom.

Član 56.

(Zaštita od požara prirodnog i kulturno – istorijskog nasljeđa)

Zaštita od požara prirodnog i kulturno – istorijskog nasljeđa organizira se i provodi u skladu sa planom zaštite od požara koji su dužni da izrade i provode nadležni organi, pravna lica i druge institucije kojima su data na korištenje i upravljanje zaštićena područja prirode i kulturno – istorijskog nasljeđa.

Odjeljak J. Obavezne mjere zaštite od požara kod privremeno povećanog požarnog rizika i način organizovanja

Član 57.

(Mjere zaštite od požara u slučaju povećanog požarnog rizika)

(1) U slučaju privremenog povećanog požarnog rizika, za cijelo vrijeme njegovog trajanja, poduzimaju se odgovarajuće dodatne, organizacijske i tehničke mjere zaštite od požara na osnovu urađenog elaborata zaštite od požara za gradilište uz primjenu odgovarajuće opreme i sredstava za gašenje, koje uključuje i osigurano dežurstvo osposobljenih i obučениh lica za ovakve poslove.

(2) Dodatne mjere iz stava (1) ovoga člana poduzimaju na osnovu izrađene procjene privremenog povećanog požarnog rizika, a posebno:

a) na privremenim mjestima koja nisu za to predviđena, na kojima se izvode radovi zavarivanja, rezanja i lemljenja, upotrebom opreme, aparata i uređaja sa otvorenim plamenom i koji varniče, a koji mogu prouzrokovati nastajanje i širenje požara, što organizira izvođač tih radova;

b) na mjestima na kojima se privremeno skladište zapaljive tečnosti i gasovi u količini do 5 m³, što organizira vlasnik ili korisnik građevine;

c) u građevinama, građevinskim dijelovima i prostorima za vrijeme održavanja skupova na kojima se privremeno okuplja veći broj ljudi (sportske, privredne, zabavne, političke i druge manifestacije) organizator manifestacije;

d) na područjima na kojima se nalaze šume, šumsko ili poljoprivredno zemljište, koja su klasificirana u I i II stepen ugroženosti od požara, utvrđene u propisima iz te oblasti što organiziraju vlasnici ili korisnici tih prostora;

e) na prostorima i objektima koji se odnose na zaštićena područja prirode i kulturno – historijskog naslijeđa, organizira državni organ, pravno lice i druga institucija kojima su dati na korištenje i upravljanje ti prostori i objekti.

(3) Mjere iz stava (1) ovog člana, mogu obavljati lica iz člana 58. ovog zakona osposobljena za tu zaštitu u skladu sa programom obuke koja se provodi prema propisu iz člana 58. stav (4) ovog zakona kao i profesionalni i/ili dobrovoljni vatrogasci.

(4) Pod mjerama iz stava (1) ovog člana podrazumjevaju prisustvo više lica stručno osposobljenih za gašenje požara sa odgovarajućom opremom i sredstvima za blagovremeno gašenje početnih požara.

(5) Za dežurstvo iz stava (2) tačka c) ovog člana potrebno je sačiniti plan preventivnog osiguranja u kojem se određuje vatrogasno dežurstvo, odnosno broj stručno osposobljenih lica za gašenje požara, potrebna oprema, uređaji i druga sredstva potrebna za zaštitu od požara i plan evakuacije. Za vrijeme trajanja sportske, privredne, zabavne, političke ili druge manifestacije, sva vrata na putevima evakuacije moraju biti otključana, a putevi evakuacije prohodni.

(6) Za dežurstvo iz stava (2) tačka d) ovog člana, organizira se osmatračko – dojavna služba, što se vrši u skladu sa posebnim propisom kojim je uređena ova materija, a dežurstvo iz stava (2) tačke e) ovog člana organizira se kao stalno dežurstvo i mora trajati sve dok traje potreba zbog koje je dežurstvo i određeno.

Član 58.

(Specijalističko-spasilački poslovi u pravnim licima)

(1) U planu zaštite od požara općine, grada odnosno kantona određuju se pravna lica koja su obavezna organizovati specijalističko-spasilačke poslove u okviru službe za zaštitu od požara iz člana 28. ovog zakona;

(2) Obavezu iz stava (1) ovog člana imaju pravna lica u kojima se proizvode, prerađuju, distribuiraju ili skladište zapaljive, eksplozivne i ostale opasne materije, u kojima zbog toga postoji povećana opasnost od požara ili eksplozija, što se određuje u procjeni ugroženosti od požara i planu zaštite od požara.

(3) Pravna lica koja nisu obuhvaćena stavom (2) ovog člana, samostalno odlučuju o potrebi obavljanja specijalističko-spasilačkih poslova za svoje potrebe što vrše u skladu sa svojom procjenom ugroženosti od požara i potrebama zaštite i spašavanja ljudi i materijalnih dobara pravnog lica.

(4) Ministar će propisati program obuke za osposobljavanje zaposlenika za obavljanje specijalističko-spasilačkih poslova u pravnim licima iz st. (2) i (3) ovog člana, i način polaganja tog ispita.

Odjeljak K. Sistemi aktivne zaštite od požara, održavanje instalacija i certifikat o usklađenosti opreme

Član 59.

(Ugradnja i/ili ispitivanje ispravnosi i funkcionalnosi sistema aktivne zaštite od požara)

(1) Vlasnik ili korisnik građevine mora prilikom ugradnje sistema aktivne zaštite od požara posjedovati projektnu dokumentaciju i potrebne ateste, te osigurati stručni nadzor nad izvođenjem radova, za sistem aktivne zaštite od požara koji namjerava ugraditi.

(2) Ugradnju i/ili ispitivanje aktivnog sistema za zaštitu od požara, može vršiti samo pravno lice koje ima odobrenje iz člana 18. tačka g) ovog zakona i koje zadovoljava posebne uslove u pogledu tehničke opremljenosti i ima zaposlena lica sa ovlaštenjem FMUP-a za projektovanje i izvođenje sistema aktivne zaštite od požara .

(3) Pravno lice koje je ugradilo sistem aktivne zaštite od požara, dužno je korisniku/vlasniku sistema, nakon završetka ugradnje sistema, dati sve pristupne šifre/kodove za centralu ugrađenog sistema, uputstvo za upotrebu, te izvršiti obuku lica koja će rukovati ugrađenim sistemom.

(4) Vlasnik ili korisnik građevine mora prije početka upotrebe ugrađenog sistema aktivne zaštite od požara pribaviti potvrdu o ispravnosti i funkcionalnosti sistema, kao i vršiti njegovu stalnu tehničku kontrolu, u skladu sa ovim zakonom, tehničkim propisima i uputstvima proizvođača, koji se odnose na ta pitanja.

(5) Nakon obavljenog ispitivanja ispravnosti i funkcionalnosti, pravno lice koje je izvršilo ispitivanje izdaje potvrdu o ispravnosti i funkcionalnosti, s tim da prvo ispitivanje ne može vršiti pravno lice koje je ugradilo sistem aktivne zaštite od požara.

(6) Potvrdu iz stava (4) ovog člana izdaje pravno lice koje ispunjava uslove za ispitivanje ispravnosti i funkcionalnosti, s tim što je to lice dužno ispitivanje ispravnosti i funkcionalnosti vršiti prema propisima iz stava (3) ovog člana.

(7) Kopiju potvrde o izvršenom prvom ispitivanju sistema aktivne zaštite od požara, pravno lice koje je izvršilo ispitivanje dostavlja nadležnoj inspekciji zaštite od požara.

(8) Vlasnik ili korisnik građevine u kojoj je ugrađen sistem za dojavu i gašenje požara, uređaji za kontrolu i zaštitno djelovanje, uređaji za sprečavanje širenja požara, instalacije i uređaji izvedeni u protiveksplozijskoj zaštiti, dužan je osigurati njihovo redovno ispitivanje ispravnosti i funkcionalnosti prema ovom zakonu, tehničkim propisima, koji se odnose na ta pitanja, a najmanje jednom godišnje, o čemu mora voditi evidenciju i posjedovati dokumentaciju.

(9) Način izdavanja odobrenja za vršenje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara, sadržaj potvrde o ispravnosti i funkcionalnosti ugrađenog sistema aktivne zaštite od požara, uslove koje moraju ispunjavati pravna lica koja vrše te poslove, kao i druga pitanja koja se odnose na sisteme aktivne zaštite od požara, uređuju se propisom koji donosi ministar.

Član 60.

(Protočni kapacitet i pritisak vode u hidrantskoj mreži)

(1) Javno preduzeće ili drugo pravno lice koje upravlja vodovodnom i hidrantskom mrežom, dužno je pri izgradnji, rekonstrukciji i korištenju ovih mreža, osigurati potrebnu projektnu dokumentaciju i propisani protočni kapacitet i pritisak vode u hidrantskoj odnosno vodovodnoj mreži za potrebe gašenja požara.

(2) Javna preduzeća ili druga pravna lica dužna su stalno održavati u ispravnom stanju hidrantsku mrežu iz stava (1) ovog člana, o čemu vode odgovarajuću evidenciju i o tome izvještavaju nadležnu profesionalnu vatrogasnu jedinicu.

(3) Vlasnici građevina i prostora i upravitelji stambenih objekata u kojima je po projektnoj dokumentaciji predviđena i ugrađena unutrašnja i vanjska hidrantska mreža dužni su osigurati njeno redovno ispitivanje ispravnosti i funkcionalnosti prema ovom zakonu, tehničkim propisima i uputstvima proizvođača, koji se odnose na ta pitanja, a najmanje jednom godišnje, o čemu mora voditi evidenciju i posjedovati dokumentaciju.

Član 61.

(Održavanje instalacija)

(1) Vlasnici ili korisnici građevina i prostora i upravitelji stambenih objekata dužni su održavati u ispravnom stanju i periodično kontrolisati postrojenja, uređaje, električne, gasne, ventilacijske i druge instalacije, dimnjake i ložišta koji mogu prouzrokovati nastajanje i širenje požara, u skladu sa tehničkim propisima i standardima na koje se ti propisi pozivaju, te uputstvima proizvođača, o čemu moraju voditi evidenciju i posjedovati odgovarajuću dokumentaciju.

(2) Ako ugovorom o zakupu prostora ili objekta nisu definisane obaveze za održavanje instalacija iz stava (1) ovog člana obaveze preuzima korisnik prostora odnosno građevine.

Član 62.

(Certifikat o usklađenosti opreme, uređaja i drugih sredstava za zaštitu od požara s propisima i standardima)

(1) Oprema, uređaji i druga sredstva za zaštitu od požara prije stavljanja u promet moraju biti usklađena sa zahtjevima važećih propisa i standarda, što se dokazuje certifikatom o usklađenosti.

(2) Izgled i način postavljanja certifikacionog znaka mora biti u skladu sa odgovarajućim propisima iz stava (1) ovog člana.

(3) Ocjenjivanje usklađenosti opreme, uređaja i drugih sredstava za zaštitu od požara može obavljati organ za ocjenjivanje usklađenosti kojeg ovlasti Ministarstvo vanjske trgovine i ekonomskih odnosa Bosne i Hercegovine, u skladu sa Zakonom o tehničkim zahtjevima za proizvode i ocjenjivanje usklađenosti.

(4) Oprema, uređaji i druga sredstva za zaštitu od požara, koja ne ispunjavaju uslove iz stava (1) i (2) ovog člana, ne smiju se stavljeti u promet i upotrebu.

(5) Oprema, uređaji i druga sredstva za zaštitu od požara prilikom izrade i/ili ugradnje moraju imati odgovarajuće ateste proizvođača sa propisima i standardima, prevedeno upustvo o upotrebi na jednom od jezika u Federaciji sa preporukama o korištenju i upotrebi.

Odjeljak L. Osiguranje građevina od požara i eksplozija

Član 63.

(Osiguranje od požara)

Osiguranje građevina od požara i eksplozija, koje vrše društva za osiguranje, sastavni je dio sistema zaštite od požara.

Član 64.

(Nosilac osiguranja od požara)

Osiguranik požarnog rizika koji koristi građevine i prostore u kojima može nastati požar ili koji olakšavaju njegovo širenje i objekti sa posebno rizičnim požarnim opterećenjem, mora da osigura od odgovornosti za štetu koja može nanijeti trećim licima, općini, gradu ili kantonu, odnosno Federaciji i bližim i daljnjim susjedima (odgovornost iz djelatnosti).

Odjeljak M. Upoznavanje javnosti i informacioni sistem zaštite od požara

Član 65.

(Upoznavanje školskih ustanova o provođenju mjera zaštite od požara)

(1) U cilju sticanja znanja, vještina i navika za unapređenje i učvršćivanje pozitivnih stavova i ponašanja značajnih za zaštitu od požara djece i učenika, nadležne školske i predškolske ustanove dužne su u okviru školskih i predškolskih programa utvrde i sprovedu program edukacije o zaštiti od požara.

(2) Nadzor nad utvrđivanjem i sprovođenjem programa edukacije o zaštiti od požara provodi ministarstvo nadležno za obrazovanje.

Član 66.

(Upoznavanje građana o mjerama zaštite od požara)

KMUP-a je u cilju upoznavanja građana o mjerama zaštite od požara u mjestima u kojima postoji povećan stepen rizika od požara dužno putem nadležnih općinskih organa preduzeti radnje na upoznavanju provođenja mjera zaštite od požara i otklanjanje uzroka koji su doprinose riziku nastanka požara na tom području.

Član 67.

(Obavješćavanje javnosti o zaštiti od požara)

(1) FMUP-a i KMUP-a su dužni kontinuirano putem medija ili na drugi način odnosno drugim sredstvima informisanja upoznati građane i pravna lica o mjerama zaštite od požara i načinu njihovog provođenja.

(2) Poslovi iz stava (1) ovog člana vrše se u okviru stručne službe iz člana 4. ovog zakona.

Član 68.

(Informacioni sistem zaštite od požara)

(1) FMUP vodi operativni centar za zaštitu od požara u kojem se sakupljaju i obrađuju podaci o događajima značajni za zaštitu od požara u skladu sa ovim zakonom.

(2) KMUP-a u okviru svojih operativnih centara organiziraju funkcionalni dio informacionog sistema za zaštitu od požara koji je integrisan na centar iz stava (1) ovog člana.

(3) Pravna lica, državni organi i druge institucije i građani dužni su operativnim centrima za zaštitu od požara dostavljati podatke o događajima koji se odnose na pojave požara i eksplozija, širenje požara, uzrocima nastanka požara, objektima i prostoru koji je ugrožen požarom, posljedicama koje su nastale i drugim podacima na području koje je ugroženo požarom ili eksplozijom.

(4) Sadržaj operativnog informacionog sistema iz oblasti zaštite od požara, te način dostavljanja, obrade i objavljivanja podataka iz stava (3) ovog člana, propisat će ministar.

POGLAVLJE III. STRUČNO OSPOSOBLJAVANJE I USAVRŠAVANJE

ZAPOSLENIH LICA ZA ZAŠTITU OD POŽARA

Član 69.

(Stručna obuka zaposlenika)

(1) Pravna lica, državni organi u Federaciji i druge institucije dužni su kontinuirano organizirati i provoditi stručno osposobljavanje i usavršavanje svih zaposlenika, odnosno državnih službenika i namještenika (u daljem tekstu: zaposlena lica) koji se nalaze u radnom odnosu, za provođenje mjera zaštite od požara na radnim mjestima na kojima se nalaze.

(2) Osnovna obuka i osposobljavanje za sve novozaposlene odmah po stupanju u rad, a najkasnije u roku od 30 dana stupanja na rad, a obuhvata upoznavanje zaposlenih lica sa svim izvorima opasnosti i načinu provođenja mjera zaštite od požara utvrđenih u općem aktu iz člana 28. ovog zakona.

(3) Pored obuke iz stava (1) ovog člana, obavezno je najmanje jednom u tri godine izvršiti obuku i provjeru znanja iz oblasti zaštite od požara svih zaposlenih lica prema posebnom programu obuke iz stava (6) ovog člana.

(4) Zaposlena lica koja se, u skladu sa odredbom člana 28. stav (1) tačka f) ovog zakona, odrede da se staraju za provođenje poslova zaštite od požara, odnosno lica raspoređena u službi zaštite od požara u pravnom licu, državnom organu i drugoj instituciji iz stava (2) tog člana, moraju imati najmanje srednju stručnu spremu, i položen ispit za protivpožarnu zaštitu iz stava (6) ovog člana, koji moraju položiti u roku od godinu dana od dana zaniivanja radnog odnosa, odnosno raspoređivanja na polove zaštite od požara;

(5) Zaposlenici su dužni da prisustvuju obuci i provjeri znanja iz oblasti zaštite od požara i da se u radu pridržavaju propisanih uputstava, zabrana, mjera zaštite od požara, upozorenja, kao i da u slučaju požara pristupe gašenju požara.

(6) Program obuke iz stava (3) i sadržaj programa i način polaganja ispita iz stava (4) ovog člana, utvrđuje ministar.

Član 70.

(Način i postupak organizovanja stručne obuke zaposlenika)

Poslove stručnog osposobljavanja zaposlenih lica prema programu iz člana 69. stava (6) ovog člana, mogu samostalno da organiziraju i provode pravna lica, državni organi u Federaciji i druge institucije koja dobiju odobrenje od F MUP-a ili da izvođenje te obuke povjere pravnim licima koja su registrirana za tu djelatnost, a koja dobiju ovlaštenje FMUP-a, da ispunjavaju uslove za izvođenje obuke utvrđene u tom programu.

POGLAVLJE IV - FINANSIRANJE ZAŠTITE OD POŽARA

Član 71.

(Osiguranje finansijskih sredstava za organizovanje, provođenje i unapređenje zaštite od požara)

(1) Finansijska sredstva potrebna za organiziranje, provođenje i unapređenje mjera zaštite od požara predviđenih ovim zakonom, kao i obučavanje i

osposobljavanje zaposlenih lica planiraju i osiguravaju pravna lica, državni organi i druge institucije svaki za svoje građevine i prostore i zaposlena lica.

(2) Finansijska sredstva za potrebe iz stava (1) ovog člana, planiraju se i osiguravaju svake godine u okviru finansijskog plana pravnog lica, državnog organa i druge institucije, u okviru sredstava za obavljanje njihove redovne djelatnosti.

Član 72.

(Osiguranje finansijskih sredstava u Budžetu)

U budžetu Federacije, kantona, općine i grada osiguravaju se finansijska sredstva potrebna za finansiranje slijedećih obaveza:

- a) u budžetu Federacije - sredstva za obaveze utvrđene u čl. 16., 17. i 18. ovog zakona;
- b) u budžetu kantona - sredstva za obaveze utvrđene u čl 19. i 20. ovog zakona;
- c) budžetu općine, odnosno grada - sredstva za obaveze utvrđene u čl. 21. ovog zakona.

Član 73.

(Poslovi zaštite od požara koji se finansiraju iz Budžeta Federacije)

(1) Federacija finansira:

- a) obavljanje poslova zaštite od požara iz člana 17. ovog zakona koji su u nadležnosti federalnih ministarstava i drugih organa Federacije
- b) pružanje pomoći kantonima, općinama i gradu za uklanjanje posljedica koje su nastale požarom radi stvaranja uslova za život ljudi na području koje je nastradalo požarom ili eksplozijom;
- c) istraživačke i razvojne projekte koji se odnose na razvoj i usavršavanje zaštite od požara od značaja za Federaciju;
- d) druge potrebe u vezi obavljanja zaštite od požara iz nadležnosti Federacije utvrđene ovim zakonom.

(2) Finansijska sredstva iz stava (1) ovog člana planiraju se i osiguravaju u budžetu Federacije na prijedlog Ministarstva.

Član 74.

(Poslovi zaštite od požara koji se finansiraju iz Budžeta Kantona)

(1) Kanton finansira:

- a) obavljanje poslova zaštite od požara iz člana 19. ovog zakona koja su u nadležnosti kantona;
- b) učešće u saniranju posljedica na području kantona koje su nastale požarom, posebno radi stvaranja uslova za život ljudi na području nastradalom požarom;
- c) istraživačke i razvojne projekte od značaja za zaštitu od požara iz nadležnosti kantona;
- d) druge potrebe u oblasti zaštite od požara iz nadležnosti kantona.

(2) Finansijska sredstva za finansiranje zadataka iz stava (1) ovog člana, planiraju se i osiguravaju u budžetu kantona na prijedlog kantonalnog ministarstva unutrašnjih poslova.

Član 75.

(Poslovi zaštite od požara koji se finansiraju iz Budžeta općine, odnosno grada)

(1) Općina, odnosno grad finansira:

a) obavljanje poslova zaštite od požara iz člana 21. ovog zakona koji su u nadležnosti općine i grada;

b) učešće u saniranju posljedica na području općine, odnosno grada koje nastanu požarom ili eksplozijom radi stvaranja neophodnih uslova za život ljudi na nastradalom području od požara, u skladu sa materijalnim mogućnostima općine odnosno grada;

c) druge potrebe u oblasti zaštite od požara iz nadležnosti općine, odnosno grada.

(2) Finansijska sredstva za finansiranje zadataka iz stava (1) ovog člana, planiraju se i osiguravaju u budžetu općine, odnosno grada na prijedlog općinskog odnosno gradskog vijeća.

POGLAVLJE V. IZVJEŠTAVANJE I EVIDENCIJE

Član 76.

(Izveštaj o zaštiti od požara KMUP-a)

(1) KMUP-a je dužno najmanje jednom godišnje sačiniti i pripremiti cijelovit izvještaj o provođenju mjera zaštite od požara utvrđenih ovim zakonom i podzakonskim propisima donesenim na osnovu ovog zakona.

(2) Izvještaj iz stava (1) ovog člana naročito sadrži podatke o datim mišljenjima i saglasnostima na elaborate i mjere zaštite od požara u glavnom projektu, o broju izdatih odobrenja za rad servisa za ispitivanje aparata za gašenje početnih požara, o datim ovlaštenjima i vrsti obuka koje je KMUP-a provelo, ugrađenim stabilnim sistemima za gašenje požara, požarima i drugim pitanjima značajnim za zaštitu od požara.

(3) Izvještaj iz stava (1) ovog člana KMUP-a dostavlja Vladi kantona i FMUP-a.

Član 77.

(Izveštaj o zaštiti od požara FMUP-a)

(1) FMUP-a najmanje jednom godišnje sačinjava i priprema izvještaj o provođenju mjera zaštite od požara utvrđenih ovim zakonom i podzakonskim propisima donesenim na osnovu ovog zakona.

(2) Izvještaj iz stava (1) ovog člana priprema se na osnovu podataka koje vodi FMUP-a i izvještaja iz člana 76. ovog zakona.

(3) Izvještaj iz stava (1) ovog člana FMUP-a dostavlja Vladi Federacije.

Član 78.

(Evidencije koje vodi FMUP-a)

(1) FMUP-a vodi sljedeće evcidencije ;

a) o pravnim licima kojima je izdato odobrenje za vršenje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara;

b) o licima koja su polažila stručni ispit za obavljaje poslove ispitivanja ispravnosti i funkcionalnosti ugrađenog sistema zaštite od požara;

c) o licima koja su polažila stručni ispita za projektovanje mjera zaštite od požara i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara;

d) o pravnim licima koja imaju odobrenje za projektovanje mjera zaštite od požara i/ili kontrole/revizije dokumentacije i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara;

e) o objektima odnosno građivanama za koje utvrđuje posebne uslove građenja koji se odnose na primjenu mjera zaštite za građevine u skladu sa članom 35. ovog zakona;

f) o pravnim licima kojima je izdata saglasnosti na elaborat zaštite od požara iz člana 39. ovog zakona;

g) o izdatim mišljenja na prostorne i druge planove zaštite od požara u skladu sa ovim zakonom;

h) o pravnim licima kojima je izdato odobrenje za provođenje stručne obuke i osposobljavanje zaposlenih lica u pravnim licima iz oblasti zaštite od požara i vodi evidencije izdatih odobrenja.

Član 79.

(Evidencije koje vodi KMUP-a)

(1) KMUP-a vodi sljedeće evcidencije, i to:

a) o pravnim licima koja imaju odobrenja za rad servisa za ispitivanje aparata za gašenje početnih požara;

b) o licima koja su polažila ispit za obavljanje poslova ispitivanja aparata za gašenje početnih požara;

c) licima koja su završila obuku o osposobljavanju pripadnika specijalističkih-spasilačkih jedinica pravnih lica i polažila ispita za specijalističkog-spasioca.

d) o licima koja su položil ispit za zaštitu od požara za zaposlena lica koja su u pravnom licu određena da se staraju za provođenje poslova zaštite od požara, kao i lica raspoređena u službi zaštite od požara;

e) o objektima odnosno građevinama za koja su određena (utvrđena) posebni uslove građenja koji se odnose na primjenu mjera zaštite za građevine;

f) o objektima odnosno građevinama za koje je izdata saglasnosti na elaborat zaštite od požara iz člana 39. ovog zakona;

g) o prostornim planovima zaštite od požara za koje su izdata mišljenja o prijenu mjera zaštite od požara;

Član 80.

(Evidencije koje vodi pravna i fizička lica)

Pravna lica, državni organi i druge institucije dužni su voditi evidenciju o požarima i eksplozijama na svojim građevinama i materijalnim dobrima što se vrši prema propisu iz člana 81. ovog zakona.

Član 81.

(Propis osadržaju evidencija)

Ministar poslova će propisati sadržaj i način vođenja evidencija iz čl. 78. i 79. ovog zakona te sadržaj registra iz člana 18. tačka p) ovog zakona, te druga pitanja koja se odnose na evidencije i registar.

POGLAVLJE VI- NADZOR NAD PROVOĐENJEM OVOG ZAKONA

Odjeljak A. Upravni nadzor

Član 82.

(Sadržaj upravnog nadzora)

(1) Upravni nadzor nad sprovođenjem ovoga Zakona provodi FMUP.

(2) Upravni nadzor obuhvata uvid i kontrolu zadataka i aktivnosti koje se odnose na provođenje mjera zaštite od požara, pregled akata i dokumentacije iz oblasti zaštite od požara, pružanje stručne pomoći davanjem stručnih objašnjenja i uputa za rad na upite pravnih lica, državnih organa i drugih institucija ili na drugi način, traženje podataka i obavještenja o obavljanju poslova zaštite od požara, poduzimanje odgovarajućih mjera na pravilnom postupanju u primjeni ovog zakona, kao i rješavanje u drugostepenom upravnom postupku u slučajevima predviđenim ovim zakonom.

(3) Pravna lica, državni organi i druge institucije dužni su dostaviti podatke i dokumentaciju koju zatraži organ iz stava (1) ovog člana.

Član 83.

(Upravni nadzor iz nadležnosti KMUP-a)

KMUP-a vrše upravni nadzor u odnosu na pitanja koja su ovim zakonom stavljena u njihovu nadležnost. Taj nadzor se ostvaruje u pravnim licima, kantonalnim organima uprave i općinskim i gradskim službama za upravu na području kantona.

Član 84.

(Nadzor nad zakonitošću poduzetih aktivnosti i mjera u oblasti zaštite od požara)

Upravni nadzor iz čl. 82. i 83. ovog zakona, odnosi se na nadzor nad zakonitošću poduzetih aktivnosti i mjera u oblasti zaštite od požara prema ovom zakonu.

Odjeljak B. Inspekcijski nadzor zaštite od požara

Član 85.

(Inspekcijski nadzor FMUP-a i KMUP-a)

(1) FMUP i KMUP-a vrše poslove inspekcijskog nadzora nad provođenjem mjera zaštite od požara određenih ovim zakonom i planovima zaštite od požara, kao i nad provođenjem propisa o tehničkim normativima i standardima koji se odnose na zaštitu od požara.

(2) Inspektori organa unutrašnjih poslova iz stava (1) ovog člana, dužni su pri vršenju inspekcijskog nadzora ostvarivati odgovarajuću saradnju u cilju rješavanja pitanja od zajedničkog interesa.

Član 86.

(Pitanja koja su predmet inspekcijskog nadzora)

(1) FMUP-a i KMUP-a vrše poslove inspekcijskog nadzora nad provođenjem mjera zaštite od požara određenih ovim zakonom, podzakonskim propisima donesenim na osnovu ovog zakona, planovima zaštite od požara, kao pravilima i propisima tehničke prakse.

(2) Inspekcijski nadzor iz stava (1) ovog člana, odnosi se na sljedeća pitanja:

a) organiziranje i provođenje zaštite od požara u državnim organima, pravnim licima i drugim institucijama u skladu sa ovim zakonom i podzakonskim propisima donešenim na osnovu ovog zakona;

b) vršenje poslova iz nadležnosti FMUP-a i KMUP-a iz člana 18. i 20. ovog zakona;

c) donošenje planova zaštite od požara federacije, kantona i pravnih lica od značaja za Federaciju i kanton u skladu sa odredbama čl. 23. ovog zakona;

d) opće akte iz člana 28. ovog zakona u državnim organima Federacije, kantona i pravnim licima od značaja za Federaciju i kantona;

e) planiranje i osiguranje finansijskih sredstava za potrebe iz člana 72. ovog zakona u državnim organima Federacije i kantona i pravnim licima od značaja za Federaciju i kanton;

f) provođenje obuke i osposobljavanja zaposlenih lica iz člana 69. ovog zakona u državnim organima Federacije i kantona i pravnim licima od značaja za Federaciju i kanton;

Član 87.

(Subjekti u kojima vrši inspekcijski nadzor FMUP-a)

FMUP-a vrši inspekcijski nadzor nad provođenjem mjera zaštite od požara u pravnim licima i drugim institucijama u privatnom i državnom vlasništvu u sljedećim oblastima:

- a) industrijskim objektima za preradu i proizvodnju zapaljivih tečnosti i gasova;
- b) industrijskim objektima za proizvodnju eksplozivnih materija;
- c) pravnim licima koja se bave transportom i distribucijom gasa u gasovodima i drugim gasnim postrojenjima za tehnološki proces;
- d) u objektima i postrojenjima za proizvodnju energije nazivne snage iznad 35 MW;
- e) skladištima zapaljivih tečnosti kapaciteta iznad 1000 m³;
- f) skladištima zapaljivih gasova kapaciteta iznad 30 m³;
- g) pravnim licima za proizvodnju i skladištenje tehničkih plinova kapaciteta iznad 30 m³;
- h) skladištima zapaljivih gasova u bocama kapaciteta iznad 5000 kg;
- i) objektima za proizvodnju farmaceutskih proizvoda;
- j) pravnim licima koja se bave prometom eksplozivnih materija, zapaljivih tečnosti i gasova, kao i promet opasnih materija u dijelu za koje je nadležno ministarstvo;
- k) pravnim licima i državnim organima i drugim institucijama kojima je povjereno na upravljanje područje prirodnog i kulturno – historijskog naslijeđa od značaja za Federaciju;
- l) pravnim licima, državnim organima i drugim institucijama koje se bave poslovima arhive i arhivske građe od značaja za nauku i istoriju;
- m) pravnim licima i objektima u državnom vlasništvu koji nisu u kategoriji industrijskih objekata;
- n) pravnim licima koja proizvode, koriste ili skladište radioaktivne materije i nuklearno gorivo i druge štetne i opasne materije za ljude i okolinu;
- o) pravnim licima i objektima čiji je vlasnik ili osnivač Federacija, odnosno u kojim Federacija ima vlasnički udio;
- p) pravnim licima koja vrše poslove ispitivanja ispravnosti i funkcionalnosti ugrađenog sistema aktivne zaštite od požara;
- r) pravnim licima koja imaju odobrenje FMUP-a iz člana 18. tačka j) ovog zakona;
- s) saraduje u akcijama policije, vezanim za kontrolu prometa eksplozivnih i drugih opasnih materija;
- t) po potrebi i pozivu nadležnog organa učestvuje u radu operativnih ekipa na razjašnjenju uzroka i utvrđivanju odgovornosti za nastanak većih požara, eksplozija i havarija, te akcidenata sa opasnim materijama.

Član 88.

(Subjekti u kojima vrši inspekcijski nadzor KMUP-a)

KMUP-a vrše inspekcijski nadzor nad provođenjem mjera zaštite od požara:

- a) u skladištima eksplozivnih materija za upotrebu u privredi;

b) u objektima i postrojenjima za proizvodnju energije nazivne snage do 35 MW;

c) u skladištima zapaljivih tečnosti kapaciteta do 1000 m³;

d) skladištima zapaljivih gasova kapaciteta do 30 m³;

e) pravnim licima za proizvodnju i skladištenje tehničkih plinova kapaciteta do 30 m³;

f) u skladištima zapaljivih gasova u bocama kapaciteta do 5000 kg;

g) u objektima hemijske, tekstilne i drvne industrije i drugim industrijskim objektima na području kantona;

h) u trgovinskom prometu i skladištenju pirotehničkih sredstava;

i) u pravnim licima i državnim organima i drugim institucijama kojima je povjereno na upravljanje područje prirodnog i kulturno-istorijskog naslijeđa od značaj za kanton, općinu i grad;

j) u državnim organima i drugim institucijama koje se bave poslovima arhive i arhivske građe iz nadležnosti kantona, općina i grada;

k) u objektima masovnog okupljanja građana (koncertne dvorane, stadioni, sportske dvorane itd.);

l) u objektima u vlasništvu kantona, općina i grada;

m) u objektima fizičkih i pravnih lica u privatnom vlasništvu koji nisu u kategoriji industrijskih objekata;

n) pravnim licima koja obavljaju kontrolu ispravnosti, servisiranje i održavanje aparata za gašenje početnog požara;

o) po potrebi sarađuju u akcijama policije, vezanim za kontrolu prometa eksplozivnih i drugih opasnih materija iz nadležnosti kantona;

p) po potrebi i pozivu nadležnog organa učestvuje u radu operativnih ekipa na razjašnjenju uzroka i utvrđivanju odgovornosti za nastanak požara, eksplozija, havarija i akcidenata sa opasnim materijama iz nadležnosti kantonalnih ministarstava za unutrašnje poslove gdje je nastala veća materijalna šteta i/ili su nastupile posljedice po ljudske živote .

Član 89.

(Lica koja provode inspekcijski nadzor)

(1) Poslove inspekcijskog nadzora iz člana 86. ovog zakona, iz oblasti zaštite od požara iz nadležnosti FMUP-a vrše federalni inspektori za zaštitu od požara, a iz nadležnosti KMUP-a vrše kantonalni inspektori za zaštitu od požara (u daljem tekstu: inspektori).

(2) Inspektori iz stava (1) ovog člana može biti lice koje ispunjava uslove predviđene za inspektore iz člana 90. stav (3) ovog zakona.

(3) Ministar će propisati sadržaj i načinu vršenja poslova inspekcijskog nadzora iz st. (1) ovog člana, kao i druga pitanja koja se odnose na inspekcijski nadzor.

Član 90.

(Provođenje inspekcijskog nadzora)

(1) Poslove inspekcijskog nadzora iz oblasti zaštite od požara obavljaju federalni inspektori zaštite od požara i kantonalni inspektori zaštite od požara, koji imaju prava i dužnosti inspektora utvrđena u Zakonu o organizaciji organa uprave u

Federaciji Bosne i Hercegovine. Inspekcijski nadzor se provodi po odredbama ovog zakona i odredbama Zakona o upravnom postupku.

(2) Osim inspekcijskog nadzora nad provođenjem ovog Zakona, inspektori obavljaju i inspekcijski nadzor nad provođenjem drugih zakona i propisa donesenih na temelju tih zakona, u slučajevima kada je to propisano posebnim propisima.

(3) Inspektori iz stava (1) ovog člana, mogu biti lica koja imaju najmanje visoku stručnu spremu, VII stepen, iz oblasti zaštite od požara, zaštite na radu, sigurnosti i drugih tehničkih struka, najmanje pet godine radnog staža, odnosno visoko obrazovanje prvog, drugog ili trećeg ciklusa Bolonjskog sistema studiranja (koji se vrednuje sa 240 ECTS bodova).

(4) Na dan stupanja na snagu ovog zakona državni službenici koji su postavljeni na radno mjesto inspektora za zaštitu od požara u ministarstvima unutrašnjih poslova ostaju na tim poslovima.

Član 91.

(Uslovi rada za inspektore)

(1) Inspektorima za zaštitu od požara iz člana 85. ovog zakona, zbog posebnih uslova rada, pripada dodatak na plaću u iznosu 30% od osnovne plaće.

(2) Za vrijeme provedeno na pasivnom dežurstvu (pripravnost za rad) federalnom i kantonalnom inspektor iz oblasti zaštite od požara pripada 15 % naknade za svaki sat pasivnog dežurstva, a evidenciju o vremenu pasivnog dežurstva dužan je voditi neposredni rukovodilac.

Član 92.

(Način obavljanja inspekcijskog nadzora)

(1) Inspektori iz člana 85. stav (1) ovog zakona, pri obavljanju inspekcijkih poslova inspekcijski nadzor vrše u skladu sa ovim zakonom i propisima i pravilima tehničke prakse.

(2) O obavljenom inspekcijskom nadzoru inspektor je dužan sastaviti zapisnik. Kopija sačinjenog zapisnika uručuje se vlasniku, odnosno korisniku kod kojeg je nadzor izvršen.

(3) Inspektor je dužan pročitati sadržaj zapisnika subjektu nadzora, nakon čega subjekt nadzora ima pravo staviti primjedbe na zapisnik o izvršenom inspekcijskom nadzoru, i to istovremeno sa sačinjavanjem zapisnika ili u roku tri dana od prijema zapisnika.

(4) Sadržaj i način vođenja Zapisnika o inspekcijskom nadzoru propisat će se u propisu iz člana 89. stav (3) ovog zakona.

Član 93.

(Donošenje upravnog akta po obavljenom inspekcijskom nadzoru)

1) U cilju sprječavanja nastajanja i širenja požara, omogućavanja gašenja požara i spašavanja ljudi i imovine ugroženih požarom, inspektor za zaštitu od požara ima ovlaštenje da rješenjem naredi preduzimanje svih mjera propisanih ovim

Zakonom, propisima i aktima donesenim na osnovu ovog Zakona, kao i mjera u funkciji zaštite od požara propisanih drugim zakonima, tehničkim propisima i standardima, uključujući i priznata pravila tehničke prakse u situaciji kad ne postoje odgovarajući domaći propisi, a naročito da se:

a) izvrši ispitivanje ispravnosti i funkcionalnosti postrojenja, instalacija ili uređaja od kojih prijeti opasnost za izbijanje požara, ili su u funkciji zaštite od požara, gašenja i sprječavanja širenja požara;

b) dovedu u ispravno stanje ili da se preurede, premjeste odnosno demontiraju postrojenja, instalacije ili uređaji od kojih prijeti opasnost za izbijanje požara;

c) dovedu u ispravno i funkcionalno stanje postrojenja, instalacije ili uređaje koji su u funkciji zaštite od požara, gašenja i sprječavanja širenja požara;

d) izvrši popravka, rekonstrukcija, dogradnja i pregradnja na objektima u svrhu sprečavanja izbijanja i širenja požara ili spašavanja ljudi i materijalnih dobara;

e) zabrani upotreba objekta ili postrojenja, uređaja i instalacija ako se njihovim preuređenjem ili drugim mjerama ne može otkloniti opasnost od požara po ljude i tuđa materijalna dobra;

f) izvrši uklanjanje građevinskih i drugih fizičkih prepreka, predmeta i materijala koji bi u slučaju izbijanja požara predstavljali smetnju za brzu i efikasnu evakuaciju ljudi i gašenje požara, ili bi svojim izgledom ili funkcijom mogli dovesti u zabludu ljude koji se evakuiraju;

g) izvrši uklanjanje zapaljivih materijala koji su ugrađeni u konstruktivne elemente građevine, ili su upotrebljeni za horizontalne i vertikalne površine evakuacionih puteva, ako ti materijali predstavljaju opasnost za nastanak i širenje požara ili u požaru razvijaju otrovne gasove ili preveliku količinu dima;

h) izvrši uklanjanje i čišćenje otpadnih materija i prašine sa mjesta na kojima pogoduju izbijanju i širenju požara;

i) zabrani upotrebu otvorenog plamena, iskrenja i žara, uključujući i uređaje koji ih mogu stvarati, na mjestima na kojima bi mogli izazvati požar;

j) zabrani upotrebu ili držanje lako zapaljivih tečnosti i gasova, kao i posebno zapaljivih čvrstih materija, ako se koriste na način koji nije siguran ili se drže na neuslovnim mjestima ili mjestima na kojima predstavljaju opasnost po okolinu;

k) poduzmu zaštitne mjere protiv namjernog ili slučajnog ubacivanja predmeta u objekte i prostore gdje bi mogli izazvati požar;

l) izvrši obilježavanje požarnih puteva i puteva evakuacije, postave odgovarajući znaci, natpisi i uputstva, izvede sigurnosna i panik rasvjeta;

m) izvedu propisani izlazi iz objekata radi omogućavanja brzog izlaska ljudi u slučaju požara;

n) osigura stalni nadzor nad mjestima gdje su smještene zapaljive i eksplozivne materije;

o) osigura stalno, povremeno ili privremeno protivpožarno dežurstvo u građevinama ili vanjskom prostoru;

p) osigura stabilne, polustabilne, mobilne i druge odgovarajuće instalacije i uređaje za gašenje požara, dovoljan broj sredstava za gašenje požara, kao i instalacije za dojavu požara i druge instalacije i uređaje sa zaštitnim i kontrolnim djelovanjem u funkciji zaštite ljudi i materijalnih dobara;

r) zabrani daljnje izvođenje radova dok izvođač radova ne poduzme potrebne mjere za sprečavanje izbijanja širenja požara i ne osigura potrebna sredstva i opremu za gašenje požara i ne uradi elaborat iz člana 57. stav (1) ovog zakona;

s) otklone nedostaci u projektnoj dokumentaciji koja nije u skladu sa propisima, standardima i drugim normativima u funkciji zaštite od požara, a prema potrebi i da zabrani daljnje izvođenje radova dok se navedeni propusti ne otklone;

t) izradi plan zaštite od požara, a prema procjeni ugroženosti od požara,

u) naredi poduzimanje drugih mjera propisanih tehničkim propisima, radi sprečavanja izbijanja i širenja požara; i

v) izvrše i druge mjere u funkciji zaštite od požara, kao i mjere koje nisu propisane domaćim zakonima i propisima, ali su kao takve ozakonjene ili publikovane i priznate tehničkom praksom u svijetu.

(2) Prije određivanja mjera iz tačke a) do e) stava 3. ovog člana, inspektor može odrediti stručni komisijski pregled objekta i postrojenja, ako ocjeni da je taj pregled neophodan.

Član 94.

(Ovlaštenja inspektora u toku vršenja inspekcijskog nadzora)

(1) Pri vršenju inspekcijskog nadzora, inspektor ima slijedeća ovlaštenja:

a) pregledati sve zatvorene prostorije i otvorene prostore, postrojenja i uređaje, te poduzeti druge radnje potrebne za utvrđivanje primjene propisanih i naređenih mjera zaštite od požara;

b) može ući u stan na traženje stanara ili radi otklanjanja ozbiljne neposredne opasnosti od požara po život i zdravlje ljudi ili materijalnih dobara većeg obima;

c) privremeno oduzeti dokumentaciju, opremu i sredstva te ostalo u vezi sa zaštitom od požara kada je to potrebno radi pravilnog vođenja postupka ili mogu poslužiti u prekršajnom ili sudskom postupku kao dokaz ili je to potrebno radi sprečavanja težih posljedica, o čemu izdaje potvrdu.

(2) Pravno lice i drugi vlasnici ili korisnici građevina i prostora dužni su omogućiti inspektorima obavljanje inspekcijskog nadzora i na njegovo traženje pružiti potrebne podatke, dokumente i obavještenja.

Član 95.

(Kontrolni inspekcijski nadzor)

(1) Inspektor prati izvršenje upravne mjere po službenoj dužnosti na osnovu obavljenog kontrolnog inspekcijskog nadzora i drugih dokaza i saznanja, o čemu sačinjava poseban zapisnik.

(2) Ako se radi o manje složenim predmetima ili kada se radi o izvršenju jedne radnje, o izvršenju upravne mjere može se sačiniti službena zabilješka.

(3) U vršenju nadzora inspektor pazi da se izvršenje provede pravilno i u skladu sa zaključkom o dozvoli izvršenja i daje uputstva neposrednom izvršiocu ili licu koje rukovodi njihovim radom.

Član 96.

(Rješenje o zabrani ili ograničenju)

Ako postoji neposredna opasnost od nastanka požara ili eksplozije i ako je ugrožen život i zdravlje ljudi i njihova materijalna dobra, i ako drugim mjerama nije moguće otkloniti opasnost, inspektor će svojim rješenjem ograničiti ili zabraniti:

- a) korištenje građevine i rad u građevini
- b) rad pojedinog uređaja;
- c) upotrebu zapaljivih, eksplozivnih i drugih opasnih materija, tehnoloških postupaka ili proizvoda;
- d) obavljanje pojedinih djelatnosti ili poslova

Član 97.

(Rješenja o naloženim mjerama inspektora)

- (1) Sve mjere iz čl. 93. i 96. ovog zakona, inspektor naređuje rješenjem.
- (2) Protiv rješenja inspektora iz Federalnog ministarstva unutrašnjih poslova može se izjaviti žalba u roku od osam dana od dana prijema rješenja. Žalba se izjavljuje federalnom ministru unutrašnjih poslova.
- (3) Rješenje donešeno po žalbi iz stava 2. ovog člana je konačno i protiv njega se može pokrenuti upravni spor kod nadležnog suda u roku od 30 dana od dana prijema rješenja.
- (4) U rješenju iz čl. 93. i 96. ovog zakona, inspektor može odrediti da žalba ne odlaže izvršenje rješenja.
- (5) Pravna lica i vlasnici i korisnici građevina i prostora i odgovorna lica za organizovanje zaštite od požara dužni su postupiti po rješenju inspektora iz stava 1. ovog člana.

Član 98.

(Žalba na rješenje kantonalnog inspektora)

- (1) Protiv rješenja inspektora iz KMUP-a, može se izjaviti žalba Inspektoratu FMUP-a u roku od osam dana od dana prijema rješenja.
- (2) Na rješenje donešeno po žalbi iz stava (1) ovog člana primjenjuje se odredba člana 97. stav (3) ovog zakona.

Član 98.

(Produženje roka za izvršenje upravne mjere)

- (1) Nadležni inspektor može na zahtjev subjekta nadzora produžiti rok izvršenja upravne mjere ukoliko propisom, na osnovu kojeg je upravna mjera naložena, nije izričito propisana zabrana odgađanja izvršenja rješenja.
- (2) Izvršenje upravne mjere može se produžiti 30 dana ako su ispunjeni sljedeći uslovi:
 - a) subjekt nadzora ima dokaz o registraciji i dozvolu za rad, a upravna mjera se odnosi na otklanjanje drugih propusta i nepravilnosti;
 - b) subjekt nadzora je započeo sa izvršenjem upravne mjere;
 - c) da se na osnovu cjelokupnog ponašanja subjekta nadzora osnovano može očekivati da će izvršiti upravnu mjeru u produženom roku za izvršenje.
- (3) O zahtjevu za produženje roka za izvršenje upravne mjere odlučuje inspektor koji je donio rješenje, o čemu donosi zaključak, protiv kojeg se ne može izjaviti posebna žalba.

Član 99.

(Inspekcijski nadzor na provođenjem mjera zaštite od požara u šumama i na šumskim zemljištima)

(1) Inspekcijski nadzor nad provođenjem mjera zaštite od požara u šumama i na šumskom zemljištu obavljaju šumarski inspektori, na poljoprivrednom zemljištu obavljaju poljoprivredni inspektori, a za zaštićena područja prirodnog i kulturno - historijskog nasljeđa nadzor vrše inspektori iz te oblasti po propisima kojima su uređene inspekcije u tim oblastima.

(2) Federalni i kantonalni inspektori iz stava (1) ovog člana, pri vršenju tog inspekcijskog nadzora imaju ovlaštenja inspektora utvrđena u propisima koji se odnose na te inspekcije.

POGLAVLJE VII - OVLAŠTENJE ZA DONOŠENJE PODZAKONSKIH PROPISA

Član 100.

(Propise koje donosi Vlada Federacije)

- 1) Vlada Federacije na prijedlog federalnog ministra unutrašnjih poslova donosi propise i to;
- a) propis za izradu procjene ugroženosti od požara (član 22. stav (2));
 - b) propis o planu zaštite od požara, način i postupak izrade plana zaštite od požara (član 24. stav (4));
 - c) propis o osnovama, mjerilima i uvjetima kategorizacije požarne ugroženosti (član 37. stav (4));

Član 101.

(Propise koje donosi ministar)

Ministar donosi propise i to:

- a) propis o načinu i postupku izdavanja i/ili oduzimanja odobrenja za projektovanje mjera zaštite od požara i/ili kontrole/revizije dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara član 38. stav (6);
- b) propis o način i postupak izrade elaborata zaštite od požara i projektovanje sistema aktivne zaštite od požara član 39. stav (3);
- h) propis o načinu polaganja stručnog ispita za projektovanje mjera zaštite od požara i/ili pružanje intelektualnih usluga iz oblasti zaštite od požara, član 47. stav (4);
- c) propis o uslovima koje moraju ispunjavati pravna lica koja obavljaju kontrolu ispravnosti, servisiranje i održavanje aparata, kao i sadržaj i način polaganja ispita za lica koja lično (neposredno) obavljaju poslove ispitivanja, servisiranja i održavanja aparata, kao i druga pitanja koja se odnose na ispitivanje, održavanje i servisiranje aparata za gašenje početnih požara, član 49. stav (6);
- d) program obuke za osposobljavanje pripadnika vatrogasno-spasilačkih jedinica pravnih lica, i način polaganja ispita, član 58. stav (4).

e) propis o uslovima izdavanja odobrenja koje moraju imati pravna lica koja obavljaju poslove ugradnje i/ili provjere i ispitivanja ispravnosti i funkcionalnosti aktivnog sistema, sadržaj potvrde o ispravnosti, kao i program i način polaganja stručnog ispita za obavljanje tih poslova, član 59. stav (9);

f) propis o sadržaju operativnog informacionog sistema iz oblasti zaštite od požara, te način dostavljanja, obrade i objavljivanja podataka, član 68. stav (4);

g) propis o sadržaj programa obuke i provjeri znanja i način polaganja ispita za zaposlena lica koja se staraju za provođenje poslova zaštite od požara, član 69. stav (6);

i) propis o sadržaju i načinu vršenja poslova inspeksijskog nadzora zaštite od požara, član 89. stav (3);

j) propis o tehničkim normativima za zaštitu skladišta od požara i eksplozija;

k) propis o sistemima za automatsku dojavu i gašenje požara i uslovima za ispitivanje uvezenih uređaja;

l) propis o osnovnim zahtjevima za opremu, zaštitne sisteme i komponente namijenjene eksplozivnoj atmosferi gasova, para, maglica i prašina.

Član 102.

(Propise koje donosi Federalno ministarstvo energije, rudarstva i industrije u saradnji sa FMUP-om)

Federalno ministarstvo energije, rudarstva i industrije u saradnji sa FMUP-om, donosi:

- a) propis o tehničkim normativima za uređaje za automatsko zatvaranje vrata i klapni otpornih prema vatri;
- b) propis o tehničkim normativima za uređaje u kojima se nanose i suše premazna sredstva;
- c) propis o uslovima koje moraju ispunjavati pravna lica ovlaštena za certificiranje požarnih karakteristika materijala i elemenata građevinskih konstrukcija;
- d) propis o tehničkim normativima za zaštitu od požara i eksplozije pri čišćenju sudova za zapaljive tečnosti;
- e) propis o tehničkim normativima za projektovanje, građenje i održavanje gasnih kotlovnica;
- f) propis o tehničkom nadzoru električnih postrojenja, instalacija i uređaja namjenjenih za rad u prostorima ugroženih eksplozivnom atmosferom;
- g) propis o mjerama zaštite od požara pri izvođenju radova zavarivanja, rezanja i lemljenja;
- h) propis o tehničkim normativima o gromobranima.;
- i) propis o smještaju i držanju ulja za loženje.

Član 103.

(Propise koje donosi Federalno ministarstvom prostornog uređenja u saradnji sa FMUP-om)

Federalno ministarstvo prostornog uređenja u saradnji sa FMUP-om, donosi:

- a) propis za zaštitu visokih objekata od požara;
- b) propis o zaštiti od požara građevina za javnu upotrebu;

- c) propis o tehničkim normativima za vanjsku i unutrašnju hidrantsku mrežu za gašenje;
- d) propis o tehničkim normativima za sisteme za odvođenje dima i toplote nastalih u požaru i u saradnji sa Federalnim ministarstvom okoliša i turizma.

Član 104.

(Propise koje donosi Federalno ministarstvo prometa i komunikacija u saradnji sa FMUP-om)

Federalno ministarstvo prometa i komunikacija u saradnji sa FMUP-om donosi propis o uslovima za vatrogasne pristupe i prolaze za stambene i druge zgrade i objekte i za sve prostore koji se smatraju građevinama i prostorima u skladu sa članom 34. stav (1) ovog zakona.

POGLAVLJE VIII - KAZNENE ODREDBE

Član 105.

(Novčane kazne i prekršaji za pravna lica)

(1) Novčanom kaznom od 5.000,00 KM do 15.000,00 KM kaznit će se za prekršaj pravno lice:

- a) ako nije donesena procjena ugroženosti i plan zaštite od požara (član 22 i 23.);
- b) ako ne izvršava zadatke utvrđene u planu zaštite od požara (član 26.);
- c) ako ne donesu opći akt iz člana 28. ovog propisa;
- d) ako ne provodi opće mjere za zaštitu od požara (član 33. stav 2.);
- e) ako u glavnom projektu mjere zaštite od požara nije prikazalo grafički, tekstualno niti je izdata potvrda kojom se potvrđuje da su mjere zaštite od požara primjenjene u glavnom projektu (član 38.);
- f) ako vrši poslove, a nema odobrenje za projektovanje mjera zaštite od požara i/ili kontrole/revizije dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara (član 38. stav (5));
- g) ako nije izrađen elaborat zaštite od požara (član 39.);
- h) ako pri izradi elaborata zaštite od požara nije predvidilo sve minimalne mjere koje sadrži elaborat (član. 39);
- i) ako je izradilo elaborata i/ili izdalo potvrdu o primjenjenim mjerama zaštite od požara bez ovlaštenja i/ili u suprotnosti sa tehničkim propisima iz člana 40.
- j) ako nije izvršena predviđena kontrola/revizija od strane ovlaštenog pravnog lica u skladu sa članom 41.
- k) ako nije pri projektovanju illi gradnji građevina i/ili ugradnji priključaka, opreme, uređaja i postrojenja predvidilo i primjenilo mjere zaštite od požara (član 43.);
- l) ako nije izgrađeno požarno stepenište ili nužni izlazi i/ili prelazi (član 44.);
- m) ako upotrebljava instalacije i uređaje, dimovode i ložišta koji nisu ispravni i ne posjeduju dokumentaciju ili ne vrši redovno čišćenje ili kontrolu/pregled u skladu sa zakonskim propisima (čl. 45.);
- n) ako koristi građevinu bez odobrenja za upotrebu građevine (član 46.);

- o) ako vrši proizvodnju i promet uređaja, opreme i sredstava namjenjenih za dojavu, gašenje i sprečavanje širenja požara koja nisu certificirana u skladu sa članom 50.;
- p) ako vrši promet zapaljivih, eksplozivnih i drugih opasnih materija koje nisu u skladu sa propisanim tehničkim normativima i standardima (član 51.);
- q) ako ne organizira i provodi zaštitu od požara u šumama i na šumskom i poljoprivrednom zemljištu u skladu sa odgovarajućim propisima (član 54.);
- r) ako ne organizira i provodi zaštitu od požara prirodnog i kulturno – historijskog naslijeđa ili ne ažurira plan zaštite od požara (član 56.);
- s) ako neizvršava obaveze u slučaju povećanog požarnog rizika (član 57.);
- t) ako u projektu nije predvidilo i primijenilo mjere zaštite od požara ili nije izradilo elaborat zaštite od požara na gradilištu (član 57. stav 1. i 4.);
- u) ako ne organizuje vatrogasno-spasilačku jedinicu pravnog lica (član 58.);
- v) ako je izvršilo ugradnju i upotrebljava sistem aktivne zaštite od požara bez projektne dokumentacije i pribavljene potvrde o ispravnosti i funkcionalnosti sistema ili ne vrši njegovu stalnu tehničku kontrolu (član 59. stav 1., 3. i 7.);
- w) ako vrši ugradnju i/ili ispitivanje sistema aktivne zaštite od požara bez odobrenja ili ako ne preda pristupne šifre/kodove i uputstvo za centralu ugrađenog sistema aktivne zaštite od požara vlasniku odnosno korisniku (član 59. stav 2. i 3.);
- x) ako ne osigurava propisani protočni kapacitet i pritisak vode u hidrantskoj i vodovodnoj mreži ili ne održava u ispravnom stanju hidrantsku mrežu ili ne vrši ispitivanje ispravnosti i funkcionalnosti hidrantske mreže (član 60.);
- y) ako nije prije stavljanja u promet izvršilo certificiranje opreme, uređaja i drugih sredstava za zaštitu od požara sa propisima i standardima (član 62.);
- z) ako nije osiguralo finansijska sredstva za organizovanje, provođenje i unapređenje zaštite od požara (član 71. stav 2.)
- aa) ako inspektoru onemoguću vršenje inspekcijskog nadzora (član 94. stav 2.)
- bb) ako ne postupi po rješenju inspektora iz člana 97. stav 5.,

(2) Za prekršaj iz stava 1. ovog člana kaznit će se i odgovorno lice u pravnom licu i drugoj instituciji novčanom kaznom od 1.000,00 KM do 2.500,00 KM.

Član 106.

(Novčane kazne za pravno lice i druge institucije)

(1) Novčanom kaznom od 3.000,00 KM do 10.000,00 KM kaznit će se za prekršaj pravno lice i druga institucija:

- a) ako ne obezbjedi finansijska sredstva za realizaciju aktivnosti iz plana zaštite od požara (član 25.);
- b) ako ne odredi zaposleno lice zaduženo za provođenje mjera zaštite od požara (član 28. stav 1. tačka f)
- c) ako ne upozna zaposlena lica sa općim aktom (član 28. stav 3.);
- c) ako nije izvršilo nabavku potrebnog broja aparata za gašenje početnih požara, prenosnih i prevoznih i/ili ako nije izvršeno održavanje i ispitivanje aparata na način predviđen u članu 49. ovog propisa ili ako vrši ispitivanje aparata bez odobrenja nadležnog organa;

d) ako stavi u prodaju ili prodaje zapaljive, eksplozivne i druge opasne materije koje nisu upakovane u propisanu ambalažu i nema propisanu dokumentaciju izdatu od strane proizvođača (član 52);

e) ako pri prevozu u cestovnom, željezničkom, pomorskom, riječnom, jezerskom i avionskom saobraćaju ne provodi mjere zaštite od požara (član 53.);

f) ako ne organizira dežurstvo i ne izradi elaborat zaštite od požara za gradilište (član 57. stav 1.);

g) ako ne održava u ispravnom stanju ili ne vrši kontrolu ispravnosti sistema aktivne zaštite (član 59.);

h) ako ne održava u ispravnom stanju instalacije (član 61.);

i) ako ne organizira i ne provodi stručno osposobljavanje i usavršavanje zaposlenih lica za zaštitu od požara ili ne osigura polaganje ispita za protivpožarnu zaštitu (član 69.);

(2) Za prekršaj iz stava 1. ovog člana kaznit će se i odgovorno lice u pravnom licu i drugoj instituciji novčanom kaznom od 600,00 KM do 1.500,00 KM.

Član 107.

(Novčane kazne i prekršaji za rukovodioce organa uprave i upravne organizacije i druge institucije)

Novčanom kaznom od 1.000,00 KM do 2 500,00 KM kaznit će se za prekršaj rukovodilac organa uprave i upravne organizacije i druge institucije:

a) ako nije donesena procjena ugroženosti i plan zaštite od požara (član 22. i 23.);

b) ako ne uskladi plan zaštite od požara sa novonastalim promjenama ili ako ne donese poseban akt (član 24. stav 2. i 3.);

c) ako ne izvršava zadatke utvrđene u planu zaštite od požara (član 26.);

d) ako ne donese opći akt iz člana 28. ovog zakona;

e) ako ne provodi opće mjere za zaštitu od požara (član 33. stav 2.);

f) ako izda odobrenje za građenje bez pribavljene saglasnosti nadležnog MUP-a iz člana 42. ovog zakona;

g) ako je izdato rješenje o odobrenju za građenje, odnosno izgradnju ili rekonstrukciju i dogradnju i nadogradnju građevine, a nisu provedene sve mjere zaštite od požara (član 46. st. 2.);

h) ako ne organizira i ne provodi stručno osposobljavanje i usavršavanje zaposlenih lica za zaštitu od požara (član 69.);

i) ako ne dostavi podatke i dokumentaciju (član 82. stav 3.);

j) ako onemogući inspektora u obavljanju inspeksijskog nadzora ili ne pruži podatke, dokumenta i obavještenja koja inspektor traži (član 94. stav 2.);

k) ako ne postupi po rješenju inspektora (član 97. stav 5).

Član 108.

(Novčana kazna za vlasnika odnosno korisnika građevine, građevinskih dijelova i drugih nekretnina i prostora odnosno upravitelja zgrade)

Novčanom kaznom u iznosu od 500,00 do 1000,00 KM kaznit će se za prekršaj vlasnik odnosno korisnik građevine, građevinskih dijelova i drugih nekretnina te prostora odnosno upravitelji zgrada:

a) ako ne poduzima mjere za smanjenje opasnosti od nastanka i širenja požara, kao i mjere za unapređenje stanja zaštite od požara na svom vlasništvu (član 31. tačka b),

b) ako ne posjeduje uređaje, opremu i sredstva za gašenje požara (član 31. tačka c),

c) ako u slučaju privremenog povećanog požarnog rizika ne poduzmu odgovarajuće dodatne, organizacijske i tehničke mjere zaštite od požara (član 57.);

d) ako ne posjeduju odgovarajuću dokumentaciju o ispravnosti i funkcionalnosti instalacija (član 61.).

Član 109.

(Novčana kazna i prekršaj za pojedinca- fizičko lice)

Novčanom kaznom od 100,00 KM do 800,00 KM kaznit će se za prekršaj fizičko lice:

a) ako ne izvršava zadatke utvrđene u planu zaštite od požara (član 26.);

b) ako ne provodi opće mjere za zaštitu od požara (član 33.);

c) ako loži otvorenu vatru i spaljuje poljoprivredni i drugi gorivi otpad biljnog porijekla suprotno odredbama člana 33. stav (1) tačka f) ovog zakona;

d) ako vrši projektovanje mjera zaštite od požara i/ili posebnih sistema zaštite od požara i/ili pruža intelektualne usluge iz oblasti zaštite od požara bez položenog stručnog ispita (član 47.);

e) ako ne nabavi odgovarajući broj i vrstu aparata i ne osigura održavanje i ispitivanje ispravnosti i funkcionalnosti aparata za početno gašenje požara (član 49.);

f) ako se ne pridržava mjera zaštite od požara u slučaju privremenog povećanog požarnog rizika (član 57.);

g) ako upotrebljava instalacije i uređaje, dimovode i ložišta koji nisu ispravni (član 61.);

h) ako inspektoru onemogućuje vršenje inspeksijskog nadzora (član 94. stav 2.);

i) ako ne postupi po rješenju inspektora (član 97. stav 5.).

POGLAVLJE IX – PRELAZNE I ZAVRŠNE ODREDBE

Član 110.

(Usklađivanje propisa kantona općina i gradova iz oblasti zaštite od požara sa ovim zakonom)

Kantoni, grad i općine dužni su u roku od šest mjeseci od dana stupanja na snagu ovog zakona izvršiti usklađivanje svojih zakona, odnosno odluka općinskog i gradskog vijeća iz oblasti zaštite od požara sa odredbama ovog zakona.

Član 111.

(Ovlaštenja nadležnih ministarstva za obavljanje stručnih poslova iz oblasti zaštite od požara)

(1) Pravna lica koja imaju ovlaštenja nadležnih ministarstva za obavljanje stručnih poslova iz oblasti zaštite od požara i obavljanje stručnih poslova ispitivanja ispravnosti ugrađenog sistema aktivne zaštite od požara dužni su u roku od godinu dana od dana stupanja na snagu ovog zakona podnijeti zahtjev za izdavanje odobrenja po ovom zakonu.

(2) Lica koja imaju položen ispit za obavljanje stručnih poslova provjere i ispitivanja ispravnosti sistema aktivne zaštite od požara izdata od nadležnog federalnog ministarstva mogu vršiti i dalje te poslove po ovom zakonu.

Član 112.

(Projektovanje zaštite od požara)

(1) Lica koja imaju položen stručni ispit za projektovanje izdato od strane nadležnog federalnog ministarstva mogu vršiti projektovanje zaštite od požara po ovom zakonu.

Član 113.

(Provođenje obuke za zaštitu od požara)

(1) Pravna lica koja imaju odobrenje za provođenje obuke za zaštitu od požara dužni su u roku od godinu dana od dana stupanja na snagu ovog zakona podnijeti zahtjev za izdavanje odobrenja po ovom zakonu.

(2) Lica koja imaju položen ispit za zaštitu od požara do stupanja na snagu ovog zakona od požara mogu vršiti poslove zaštite od požara po ovom zakonu.

Član 114.

(Usklađivanje općih akata i poslovanja)

Subjekti iz člana 3. ovog zakona dužni su da usklade svoje opće akte i poslovanje, koji se odnose na zaštitu od požara sa odredbama ovog zakona u roku od godinu dana od dana stupanja na snagu ovog zakona.

Član 115.

(Rješavanje zahtjeva koji su podneseni do stupanja na snagu ovog zakona)

Zahtjevi koji su podneseni do stupanja na snagu ovog zakona rješavat će se po odredbama zakona koji je važio do stupanja na snagu ovog zakona.

Član 116.

(Važenje postojećih propisa i rok za donošenje propisa po ovom zakonu)

(1) Postojeći podzakonski propisi koji se odnose na pitanja iz čl. 100. do 104. i drugim odredbama ovog zakona, ostaju na snazi do donošenja propisa predviđenih u tim zakonskim odredbama, ukoliko nisu u suprotnosti sa odredbama ovog zakona.

(2) Podzakonski propisi predviđeni ovim zakonom donijet će se u roku od godinu dana od dana stupanja na snagu ovog zakona.

Član 117.

(Prestanak primjene odredbi Zakona o zaštiti od požara i vatrogastvu)

Danom stupanja na snagu ovog zakona prestaje primjena odredbi čl. 2. do 55. i odredbi čl. 145. do 176. Zakona o zaštiti od požara i vatrogastvu („Službene novine Federacije BiH“, broj: 64/09), dok ostali dio ostaje na snazi do donošenja zakona o vatrogastvu koji će regulisati vatrogastvo za čiju je nadležnost zadužena FUCZ.

Član 119.

(Stupaje na snagu zakona)

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE

I - USTAVNI OSNOV ZA DONOŠENJE ZAKONA

Ustavni osnov za donošenje Zakona o zaštiti od požara je sadržan u odredbi člana IV A. 20. (1) d) Ustava Federacije Bosne i Hercegovine u kojoj je propisano da Parlament Federacije nadležan za donošenje zakona o vršenju dužnosti federalne vlasti.

II - RAZLOZI ZA DONOŠENJE ZAKONA

Vlada Federacije Bosne i Hercegovine je razmatrala Izvještaj o inspeksijskom nadzoru iz oblasti zaštite od požara te je donijela Zaključak kojim je naložila Federalnom ministru unutrašnjih poslova da imenuje radnu grupu koja će izraditi poseban Zakon o zaštiti od požara.

Važećim Zakonom o zaštiti od požara i vatrogastvu poslovi zaštite od požara organizovani su većim dijelom u okviru Federalne uprave civilne zaštite, što je u suprotnosti sa odredbama Zakona o federalnim ministarstvima i drugim tijelima federalne uprave, jer je tim zakonom definisano da su poslovi zaštite od požara u djelokrugu poslova Federalnog ministarstva unutrašnjih poslova.

Takođe u toku vršenja poslova inspeksijskog nadzora iz oblasti zaštite od požara iz djelokruga rada federalnih i kantonalnih inspektora utvrđene su određene manjkavosti zakonskih rješenja koje onemogućuju pravilnu i zakonitu primjenu mjera zaštite od požara utvrđenih Zakonom o zaštiti od požara i vatrogastvu. To se naročito odnosi kod primjene mjera zaštite od požara u toku građenja i sistema aktivne zaštite od požara.

S obzirom da su navedena pitanja iz isključive nadležnosti organa unutrašnjih poslova odlučeno je da se pristupi izradi novog zakona o zaštiti od požara.

III - OBRAZLOŽENJE PREDLOŽENIH RJEŠENJA

IV - USKLAĐENOST PROPISA S EVROPSKIM ZAKONODAVSTVOM

Federalno ministarstvo unutrašnjih poslova nije moglo utvrditi da postoji primarni i sekundarni izvor prava Evropske unije koji regulišu na poseban način pitanja koja su regulisana navedenim zakonom.

V - PROVEDBENI MEHANIZMI I NAČIN OSIGURANJA POŠTIVANJA PROPISA

Provođenje Zakona o zaštiti od požara osigurat će Federalno ministarstvo unutrašnjih poslova i kantonalna ministarstva unutrašnjih poslova, putem pravilnog vršenja nadzora na primjenom ovog zakona te izdavanja odobrenja i saglasnosti po zahtjevima i aktima pravnih lica u skladu sa ovim zakonom.

VI - OPIS KONSULTACIJA VOĐENIH U PROCESU IZRADE PROPISA

VII - FINANSIJSKA SREDSTVA

Za realizaciju ovog zakona nisu potrebna dodatna sredstva u Budžetu federacije Bosne i Hercegovine.